



西江志卷第三十九

古蹟二

袁州府

萍鄉故城太平寰宇記在縣東四十里晉太興元年陳敏僭
王江東與杜弢謀相應元帝遣鎮南將軍陶侃水陸二道
來伐又使甘卓領兵至縣東築壘即此地也

蕭史臺明一統志在府城西北六十里鸞溪傍

昭王臺豫章書萍鄉縣北九十里楚山相傳楚昭王嘗經此
山頂有昭王臺遺跡下有昭王祠

宜春臺府志在府治東南隅城塚記漢宜春侯劉成於城中
立五臺其最勝者宜春也高五十餘丈植桃李以萬計宋
劉嗣隆記闐闐之傍崛起數百尺陰森竹樹掩映棟宇周



覽川原下望人煙為一州壯觀祖無擇詩序郡有五臺號
宜春者為甲李觀詩謫官誰住小蓬萊惟有宜春最古臺
千里待看毫末去萬家攢作畫圖來

按名勝志五臺自宜春而外有仙女鳳皇二臺又彭氏
釣臺湖岡臺俱在五臺之數攷湖岡臺云晉鄧表居此
以禮斗釣臺唐徵士彭構雲所嘗釣遊則指袁郡今日
之五臺三峽而言斯可矣若謂即漢劉成所立之五臺
恐非確據也姑並志之

袁閣隱居府志在分宜縣西北十里袁嶺下東漢陳蕃薦袁
閣可登三事安車徵之及黨禍作閣築土室隱居其下

仙女臺名勝志在城東南隅與宜春臺相望

鳳凰臺名勝志在城西南隅枕城為臺樓觀突兀竹松交翠

亦堪競勝

陳重故宅名勝志分宜縣北八十里有陳重山漢陳重墓在
焉下有勝因寺乃重之故宅也

甘卓壘舊志甘卓壘近蘆溪鎮明一統志聖岡嶺即甘卓築
壘處

按城塚記卓築壘接連五所此外三壘不可攷云

湖岡臺名勝志距州城南十五里晉時鄧表居之上有丹臺
丹池及禮斗石

泰和臺府志在萍鄉縣西晉泰和間創故名兩山環抱中廣
數里有古井靈泉

黃真人臺明一統志在分宜縣南五十里臺有巨石夷坦相
傳晉時有黃大古者修煉於此

葛仙壇林志在萍鄉縣羅霄山巔即晉葛洪修煉處上生叢竹風來垂地如埽名埽壇竹

袁京故居太平寰宇記宜春縣東北五里有袁山晉隱士袁京居其下卒葬於側今高士坊是其處山以人名州以山名也

龜井名勝志宜春治有五井象龜相傳袁天罡教民鑿以剋火不顯為汲用也

習鑿齒書堂名勝志在萬載縣西八十里山谷深邃雖霽恒有雲霧相傳晉習鑿齒讀書其中今分宜縣有習墓

梁丞相袁璞宅名勝志即開元寺在宜春縣治前文會坊西需宴亭林志唐天寶間太守房瑄建柳河東集袁州之南有亭曰需宴刺史太原王涯增飾以立房公德銘

按德銘李華所作宗元書其碑陰

彭徵君釣臺盧肇記宜春郡東五里呼岡西北有石室臨游溪之浹邑人彭先生嘗釣此巖下先生諱構雲伉之祖也善黃老言寶應中以玉帛召不至時太守命其鄉曰徵君鄉巖曰徵君釣臺宋祖龍學集彭徵君釣臺詩小序彭御名雲宜春人善講易注通元真經唐天寶中刺史李璟以其名聞上遣齊延丘以蒲輪徵之二往始至元宗欲官之堅辭歸鄉有釣臺在震山前山離州東十里釣臺本一巨石紹興己未季春雷轟石斷

按祖序與盧記微有同異並錄以備參攷

讀書巖明一統志秀江之上有化成巖唐刺史李德裕讀書其內後人因山石以鑄公像為亭而祀之又有軒曰倚巖

翠靄宋紹興中州守陳述建有亭曰振鷺容安仰高覽勝
漱石嵌空皆在巖上周光記嘉靖戊午郡守渤海季德甫
建屋凡三楹扁曰化成軒府志萬曆中知府黃鳴喬別構
一樓督學黃汝亨顏曰托賦以衛公讀書此中曾著十五
賦也

陶公石室府志在萬載縣東三十里一巖突起平田約高三
丈中有石室相傳唐竹溪六逸陶沔晚歲隱居之所

雷塘明一統志在府城東北七里唐韓愈有雷塘禱雨文

盧狀元書堂童宗說文標集序郡之南修仁鄉有盧狀元書
堂遺址存焉名勝志宋元豐中王雲晉卿買之築堂爲燕
居所李觀李沖元爲之賦詩作銘去城三十里又云盧肇
讀書臺在分宜縣鐘山之側鄧廷聞詩鐘山高高鐘水綠

昔有佳人在幽谷臺荒只見草萋萋萬卷不留誰更讀

盧氏弋林盧肇自記咸通七年余罷新安守以俸錢易負郭
二頃在震山之西又得楓樹林於溪南日與郡守高公厚
遊其下或羅鳥置兔挾彈走馬於其間亦請命其林曰盧
氏弋林以對其東之彭氏釣渚焉

羅隱讀書臺明一統志在分宜縣北五十里臺西有車書巷
後有石倉前有洗硯池相傳唐羅隱嘗讀書於此

龍王閣明一統志在府城南五十里蟠龍山上蟠龍寺前平
挹雲峰蓋勝境也王雲詩經夏地無暑未寒泉有冰

鄭谷讀書處府志在仰山下距袁州府城南八十里

借翠軒府志在府治南五代劉仁贍建旁多竹樹因名

鍾傳宅府志宅在州西北化成巖側唐僖宗所賜第有南北

二池今遺址與池尚存又有別業在萬載縣北十五里今
爲民田前有石筍人稱爲鍾令公石

按唐書志武德八年以高安屬洪州南唐書保大中又
分洪州高安縣置筠州割萬載清江上高屬焉鍾傳時
鎮洪州故府城有宅而高安宜春萬載各縣賜第別業
往往散見諸志中者以此

峽山寨林志在分宜縣南其地山峻水險高崖峭壁舊傳李
克用曾駐兵于此遺址尚存

按五代史李克用以追黃巢過汴州休軍封禪寺幾爲
朱全忠所害繼尉氏門而出自後且不再至河南焉得
有屯兵分宜縣峽山之事耶

澄源閣名勝志在府治後圃宋乾德初州守呂延真建其右

有深樾亭沈昭遠爲序并詩

疏泉亭明一統志在府城內宋天禧間袁延慶倅是州民罹
火災慶疏李渠以備火民甚便之因建亭於上慶自爲記
并賦詩刻於石壁

無訟堂明一統志在府治內宋州守阮閱建有序并詩云欲
爲袁人雪謗聲因將無訟榜堂名

清心堂明一統志在府治內宋守沈昭遠立趙資道詩燕坐
都忘塵慮縈小橋橫絕跨幽亭漣漪池面銀開鑑滌蕩庭
心玉展屏

吏隱堂林志在府治內宋守趙資道建

樂游堂祖龍學東湖記東湖舊有四亭不治以荒予別爲堂
亭臺閣其上樂州人之觀遊是好遂署其中堂曰樂游東

莽不克而死是郭說所本也雷次宗豫章記云賈萌河東人漢更始二年爲郡太守謀王莽師敗死即七日顯靈於津立祠說小異矣水經注則云賈萌與安成侯張普爭地爲普所害安成記及太平御覽皆從其說而班固漢書王莽傳云傳莽首詣更始懸宛市曹部監杜普陳定大尹沈意九江連率賈萌皆守郡不降爲漢兵所誅則萌死於更始建元以後萌實助莽謂討莽而死者事尤失實豫章始爲立廟後廢而不血食固其宜也

天鳳四年

丁丑

羣盜起餘千人陳靖糾兵討之

饒州事考

後漢

光武帝建武元年

乙酉

汝陰王劉信

劉顯子

據豫章桂陽太守張

隆擊降之

豫章書

豫章書宗室傳云初信爲更始討平汝南因封汝陰王信遂將兵平定江南據豫章光武即位桂陽太守張隆擊破之信乃詣洛陽降以爲汝陰侯

順帝陽嘉元年

壬申

春三月揚州六郡妖賊章何等寇四十九

縣殺傷長吏

後漢書順帝紀

晉書地理志云揚州統會稽丹陽吳豫章九江廬江六郡建康元年甲申秋八月揚徐盜賊范容周生等寇掠城邑遣御史中丞馮緄督州郡兵討之同上

沖帝秋九月揚州刺史尹耀九江太守鄧顯討賊范容等軍敗爲賊所歿冬十一月九江盜賊徐鳳馬勉等稱無上將軍攻燒城邑十二月九江賊黃虎等攻合肥

沖帝紀按沖帝於乙酉改

元永嘉在位不滿五月

質帝永嘉元年

乙酉仍
沖帝號

春三月九江賊馬勉稱皇帝九江都

尉勝撫討馬勉范容周生大破斬之秋七月廬江盜賊攻

尋陽勝撫遣司馬王章擊破之冬十一月歷陽賊華孟自

稱黑帝攻殺九江太守楊岑勝撫率諸將擊孟等大破斬

之質帝紀

按順帝建康以下數條皆豫章書所載故錄之但漢之
九江郡所統十四城毫無涉於今之江右惟廬江盜賊
攻尋陽一條據郡國志云尋陽南有九江東合為大江
稍可傳會然漢之尋陽本在江北近蘄州界晉惠帝永
興元年始分廬江之尋陽武昌之柴桑二縣置尋陽郡
屬江州懷帝永嘉元年又以豫章之彭澤縣屬尋陽郡
則郭書亦強載也若江西大志以徐鳳馬勉亂事入建

武年間舛錯尤甚

桓帝延熹五年

壬寅

秋八月艾縣賊焚燒長沙郡縣寇益陽殺

令桓帝紀

按綱目書於五年之夏據帝紀在八月艾縣今之寧州
武寧地春秋傳魯哀公二年吳公子慶忌出居於艾即
此漢屬豫章郡

七年甲辰夏五月

據帝紀當
在秋七月

荆州刺史度尚擊艾縣賊平之通鑑綱目

度尚傳云延熹五年長沙零陵賊合七八千人自稱將軍
遣御史中丞盛修募兵討之不能尅豫章艾縣六百餘人
應募而不得賞直怨恚遂反焚燒長沙郡縣寇益陽殺縣
令衆漸盛又遣謁者馬睦督荆州刺史劉度擊之軍敗睦

度奔走尚書朱穆舉尚擢為荊州刺史尚躬率部曲與同
勞逸廣募雜種諸蠻夷明設購賞進擊大破之降者數萬
人尚出兵三年羣寇悉定七年封右鄉侯

獻帝初平四年

癸酉

春三月袁術殺揚州刺史陳溫

獻帝紀

興平元年

甲戌

秋九月以劉繇為揚州刺史

通鑑綱目

二年

乙亥

冬十二月孫策擊劉繇於曲阿破走之繇攻豫章笮

融走死以華歆為豫章太守

同上

袁宏漢紀云劉繇將奔會稽許子將曰會稽富貴策之所
貪且窮在海隅不可生也不如豫章北連豫壤西接荊州
若收合吏民遣使貢獻與曹兗州相聞雖有袁公路隔在
其間其人豺狼不能久也足下受王命孟德景升必相救
濟繇從之

吳書劉繇傳云繇奔丹徒遂泝江南保豫章駐彭澤笮融
先至殺太守朱皓入居郡中繇討融為所破復招合屬縣
攻破融融敗走入山為民所殺繇尋病卒

建安三年

戊寅

秋九月以孫策為討逆將軍封吳侯

通鑑

江表傳云太史慈從豫章還見策曰華子魚良德也然非
籌略才丹陽僮芝自擅廬陵詐言被詔書為太守鄱陽民
帥別立宗部阻兵守界近自海昏有上繚壁五六千家相
結聚作宗伍惟輸租布於郡耳發召一人遂不可得子魚
亦覩視之而已策拊掌大笑乃有兼并之志

四年

己卯

冬十一月孫策徇豫章太守華歆降

同上

江表傳云廬江太守劉勳糧食少遣從弟偕告糴於豫章
太守華歆歆郡素少穀遣使將偕就海昏上繚使諸宗帥

共出三萬斛米與偕偕乃報勲使來襲取之勲得偕書潛軍到海昏宗帥空壁逃匿了無所得時策西討黃祖行及石城聞勲輕身詣海昏分遣從兄賁輔率八千人於彭澤待勲自與周瑜率二萬人步襲皖城即克之輔又於彭澤破勲勲與偕北歸曹公策討黃祖旋軍欲過取豫章使虞翻徑到郡謂歆曰討逆將軍智略超世用兵如神今欲守孤城自料資糧已知不足不早為計悔無及也今大軍已至椒丘明日日中迎檄不到者與君辭矣翻既去歆明日出城遣吏迎策策既定豫章引軍還吳

吳書孫討逆傳云以孫賁為豫章太守分豫章為廬陵郡以賁弟輔為廬陵太守

通鑑紀事云會僮芝病輔遂進取廬陵留周瑜鎮巴丘

按豫章書載是年周瑜鎮巴丘引裴松之云孫策於時始得豫章廬陵尚未能定江夏瑜之所鎮應在今巴丘縣也與後所屯巴丘不同又引晉地理志謂廬陵郡有巴丘縣今撫州崇仁縣即其地梁改巴丘曰巴山然考瑜本傳先已為江夏太守矣巴丘之不屬廬陵明甚蓋吳之巴丘即今岳州巴陵地在漢為長沙郡下雋縣也

五年

庚辰

夏四月孫策卒弟權代領其眾

通鑑綱目

八年權西伐黃祖破其舟軍惟城未克山寇復動還過豫章使呂範平鄱陽程普討樂安太史慈領海昏

吳書吳主傳

呂範傳云征江夏還定鄱陽策薨奔喪於吳後權復征江夏範與張昭留守曹公至赤壁與周瑜等俱拒破之拜裨將軍領彭澤太守以彭澤柴桑歷陽為奉邑

據傳則範平鄱陽在孫策

時八年鄱陽復叛
討平者亦非範也

程普傳云從征江夏還過豫章別討樂安樂安平定代太

史慈備海昏

代慈事在十一年後

太史慈傳云劉表從子磐驍勇數為寇於艾西安諸縣策於是分海昏建昌左右六縣以慈為建昌都尉治海昏並督諸將拒磐磐絕迹不復為寇孫權統事以慈能制磐遂委南方之事建安十一年卒

十年

乙酉權使賀齊討上饒分為建平縣

吳主傳

賀齊傳云八年齊軍討漢興經餘汗以為賊眾兵少深入無繼恐為所斷令楊松長丁蕃留備餘汗蕃本與齊鄰城恥見部伍辭不肯留齊乃斬蕃於是軍中震慄無不用命十年轉討上饒分為建平縣

十三年

戊子

周瑜破曹操於赤壁使程普駐兵瑞昌忽有羣鳥飛集軍中以為佳祥已而得捷遂名赤烏鎮

九江兵防志

十五年

庚寅

分豫章為鄱陽郡

吳主傳

步騭傳云建安十五年出領鄱陽太守

十八年

癸巳

豫章東部民彭材李玉王海等起為賊眾萬餘人賀齊討平之誅其首惡餘皆降揀其精健為兵次為縣戶

遷奮武將軍

吳書賀齊傳

十九年

甲午

閏五月權拜呂蒙為廬江太守還屯尋陽

通鑑綱目

呂蒙傳云蒙還尋陽未期廬陵賊起諸將討擊不能禽權曰鷲鳥累百不如一鴟復令蒙討之蒙至討其首惡餘皆釋放復為平民

二十一年丙申鄱陽民尤突受曹公印綬化民為賊賀齊與陸遜討破突斬首數十餘黨震服吳書賀齊傳

二十四年己亥冬十二月以孫權為票騎將軍領荊州牧封南昌侯通鑑

三國

蜀漢昭烈帝章武元年辛丑八月孫權遣使降魏建安二十五年冬十月魏

王曹丕稱皇帝改元黃初二年廢獻帝為山陽公魏封權為吳王通鑑綱目

二年壬寅冬十月吳王權改元黃武十一月魏主丕自將擊之同上

漢後主建興四年丙午吳黃武五年吳黃武五年十二月吳鄱陽賊彭綺反同上

五年丁未吳黃武六年吳黃武六年春正月吳討彭綺禽之同上

周魴傳云黃武中鄱陽大帥彭綺作亂攻沒屬城乃以魴

為鄱陽太守與胡綜戮力致討遂生擒綺送詣武昌又云

賊帥董嗣負阻劫鈔豫章臨川並受其害裴松之二云孫亮

臨川郡是時未有臨川吾粲唐資嘗以三千兵攻守連月不能拔魴

表乞罷兵得以便宜從事遣間諜授以方略誘狙殺嗣嗣

弟怖懼詣武昌降於陸遜乞出平地自改為善由是數郡

無復憂惕

七年己酉吳黃龍元年吳黃龍元年夏四月吳王孫權稱皇帝同上

十二年甲寅吳嘉禾三年吳嘉禾三年冬十一月廬陵賊李桓等為亂吳主傳

十三年乙卯吳嘉禾四年吳嘉禾四年夏遣呂岱討李桓等同上

呂岱傳云廬陵賊李桓路合會稽東冶賊隨春南海賊羅厲等一時並起權詔岱督劉纂唐資等分部討擊春即時首降岱拜春偏將軍使領其眾桓厲等皆見斬獲按吳主傳中郎

將吾粲獲李桓傳首詣都

十四年丙辰吳嘉禾五年冬十月鄱陽賊彭旦等為亂同上

十五年丁巳吳嘉禾六年春二月陸遜討彭旦等其年皆破之同上

陸遜傳云嘉禾六年中郎將周祗乞於鄱陽召募事下問遜以為此郡民易動難安不可與召恐致賊寇祗固陳取之郡民吳遽等果作賊殺祗攻沒諸縣豫章廬陵宿惡民並應遽為寇遜自聞輒討即破遽等相率降料得精兵八千餘人

按大志載周祗事始末不詳并缺年分饒州事考悞入建安十五年皆由未觀陸遜傳也

延熙元年戊午吳赤烏元年夏呂岱討廬陵賊畢還陸口同上

二年己未吳赤烏二年冬十月吳將周胤有罪瑜子封都鄉侯時廢將兵千人屯公安

徙廬陵通鑑綱目

六年癸亥吳赤烏六年冬十二月司馬懿率軍入舒諸葛恪自皖遷

於柴桑吳主傳

十五年壬申吳主亮建興元年夏四月吳徙其齊王奮於豫章通鑑綱目

二十年丁丑吳太平二年春二月以豫章東部為臨川郡秋八月鄱

陽民為亂廷尉丁密步兵校尉鄭胄將軍鍾離牧率軍討之孫亮傳

鍾離牧傳云建安鄱陽新都三郡山民作亂出牧為監軍使者討平之賊帥黃亂常俱等出其部伍以充兵役牧封秦亭侯拜越騎校尉

吳永安七年甲申蜀漢已亡魏咸熙元年興秋七月廬陵豫章民

張節等為亂眾萬餘人 孫休傳

晉

武帝泰始三年 丁亥吳寶 冬十二月皓分豫章廬陵長沙為

安成郡 孫皓傳

九年 癸巳吳鳳 豫章太守張俊修豫章城 豫章書

咸寧五年 己亥吳天 冬十一月晉大舉兵分道伐吳 通鑑綱

目

晉書武帝紀云遣安東將軍王渾出江西

按方輿紀要王渾出橫江在今和州東南二十五里即

大江也與今之江西無涉

太康元年 庚子 春三月吳主皓降晉吳亡冬十月改廬陵南部

為南康郡 豫章書

武帝紀云孫皓面縛輿櫬降於軍門王濬送京師收其圖

籍克州四郡四十三縣三百一十三

八年 丁未 冬十月南康平固縣吏李豐反聚眾攻郡縣自號將

軍捕討伏誅 武帝紀

惠帝元康元年 辛亥 秋七月分揚州荊州十郡為江州 惠帝紀

太安二年 癸亥 秋七月劉弘遣陶侃討張昌昌走眾降 通鑑綱

目

惠帝紀云夏五月義陽蠻張昌舉兵反以山都人丘沉為

主改姓劉氏偽號漢建元神鳳六月遣荊州刺史劉弘等

討張昌於方城敗績秋七月昌陷江南諸郡豫章太守閻

濟等遇害昌別帥石冰寇揚州刺史陳徽與戰大敗諸郡

盡沒八月劉弘及張昌戰於清水斬之冬十一月征東將

軍劉準遣廣陵度支陳敏擊冰

永興二年_{乙丑}冬十二月陳敏據江東劉弘遣江夏太守陶侃

將兵討破之同上

惠帝紀云右將軍陳敏反自號楚公逐揚州刺史劉機遣弟恢南略江州

陳敏傳云敏弟昶知顧榮等有貳心勸敏殺之不從昶將精兵據烏江弟恢率錢端等南寇江州弟斌東略諸郡遂據有吳越之地

懷帝永嘉元年_{丁卯}春三月陳敏將顧榮周玘殺敏以降同上

懷帝紀云七月以平東將軍琅琊王睿為安東將軍都督揚州江南諸軍事

五年_{辛未}夏五月杜弢陷長沙六月琅琊王睿遣兵擊江州刺

史華軼斬之同上

杜弢傳云弢自稱平難將軍湘州刺史攻破郡縣刺史苟眺委城走眺之走也州人推安成太守郭察領州事因率眾討弢反為所敗察死之

華軼傳云洛郡不守司空荀藩移檄以帝為盟主承制改易長吏軼不從命於是遣左將軍王敦都督甘卓周訪宋典趙誘等討之軼遣別駕陳雄屯彭澤以拒敦自率舟師為援武昌太守馮逸次於湓口訪擊逸破之前江州刺史衛展不為軼所禮與豫章太守周廣為內應潛軍襲軼軼眾潰奔於安成追斬之及其五子傳首建鄴

愍帝建興元年_{癸酉}夏五月陶侃破走杜弢同上

陶侃傳云時周顛為荊州刺史先鎮潯水城一統志云潯水城在九江

府城西十五里 本漢尋陽縣 賊掠其良口侃使部將朱伺救之賊退保冷口侃謂諸將曰此賊必更步向武昌吾宜還城賊果增兵來攻侃使朱伺等逆擊大破之

三年^{乙亥}春二月杜弢別將杜弘張彥與臨川內史謝摛戰于海昏摛敗績死之三月豫章內史周訪擊杜弘走之斬張彥於陣秋八月荊州刺史陶侃攻杜弢弢敗走道死 愍帝紀

周訪傳云命訪與諸軍共征杜弢弢作桔槔打官軍船艦訪作長岐棖以距之桔槔不得為害而賊從青草湖密抄官軍又遣其將張彥陷豫章王敦時鎮湓口遣督護繆綦李恒受訪節度共擊彥綦於豫章石頭與彥戰彥軍退走訪率帳下將李午等追彥破之臨陣斬彥時訪為流矢所

中折前兩齒形色不變及暮訪與賊隔水賊眾數倍自知力不能敵夜令軍中多布火而食賊謂官軍益至未曉而退訪促渡水北斷橋訖賊復至隔水不得進遂歸湘州訪復以舟師造湘城軍達富口而弢遣杜弘出海昏時湓口騷動訪步上柴桑偷渡與賊戰斬首數百賊退保廬陵訪追擊敗之賊嬰城自守訪復圍廬陵弘大擲寶物於城外軍人競拾之弘因陣亂突圍而出率軍追之獲鞍馬鎧仗不可勝數弘入南康太守將兵逆擊又破之奔於臨賀進訪為龍驤將軍王敦表為豫章太守加征討都督賜爵尋陽侯

王敦傳云侃之滅弢也敦以元帥進鎮東大將軍開府儀同三司加都督江揚荆湘交廣六州諸軍事江州刺史封

漢安侯敦始自選置兼統州郡焉頃之杜弼將杜弘南走廣州求討桂林賊自效敦許之陶侃距弘不得進乃詣零陵太守尹奉降奉送弘與敦用為將遂見寵待南康人何欽所居嶮固聚黨數千人敦就加四品將軍於是專擅之迹漸彰矣

元帝建武元年丁丑秋七月杜曾攻陷楊口豫章太守周訪討破之通鑑綱目

周訪傳云杜曾逐王廙徑造沔口元帝命訪擊之訪有衆八千進至沔陽使將軍李恒督左甄許朝督右甄自領中軍令曰一甄敗鳴三鼓兩甄敗鳴六鼓自旦至申兩甄皆敗訪選精銳八百人自行酒飲之勅不得妄動聞鼓音乃進賊未至三十步訪親鳴鼓將士皆騰躍奔赴曾遂大潰

殺千餘人訪夜追之諸將請待明日訪曰曾驍勇能戰向之敗也彼勞我逸是以尅之宜及其衰乘之可滅曾遁走

訪部將蘇溫收曾詣軍按帝紀訪斬曾在

大興元年戊寅春三月即皇帝位夏四月加大將軍王敦江州牧元帝紀

永昌元年壬午春正月大將軍王敦舉兵武昌以誅劉隗為名三月遣平南將軍陶侃領江州安南將軍甘卓領荊州各帥所統以躡敦後同上

明帝太寧元年癸未冬十一月王敦以其兄征南大將軍含為征東大將軍都督揚州江西諸軍事以軍國饑乏調刺史以下米各有差明帝紀

二年甲申夏六月尋陽太守周光舉兵應王敦秋七月敦死光

西漢志 卷二十九
斬錢鳳詣闕自贖豫章書

周光傳云敦以光爲寧遠將軍尋陽太守及敦舉兵光率千餘人赴之既至敦已死光未之知求見敦王應祕不言以疾告光退曰我遠來而不見公其死乎遽見其兄撫曰王公已死何爲與錢鳳作賊衆並愕然其夕衆散錢鳳走出至闔廬洲光捕鳳詣闕贖罪故得不廢

成帝咸和元年

丙戌

秋八月以溫嶠爲平南將軍假節都督江

州刺史

成帝紀

溫嶠傳云咸和初代應詹爲江州刺史持節都督平南將軍陳豫章十郡之要宜以刺史居之尋陽濱江都督應鎮其地時嶠鎮武昌今以州帖府進退不便且古鎮將多不領州皆以文武形勢不同故也宜選單車刺史別撫豫章專理

黎庶詔不許

三年

戊子

春正月溫嶠以兵赴難至尋陽二月庾亮奔尋陽蘇

峻兵犯闕夏五月嶠以陶侃入討峻

通鑑綱目

嶠傳云蘇峻反嶠屯尋陽遣督護王愆期西陽太守鄧嶽鄱陽內史紀瞻等率舟師赴難及京師傾覆嶠聞之號慟俄而庾亮來奔宣太后詔進嶠驃騎將軍開府儀同三司嶠曰今日之急殄寇爲先未效勳庸而遂受榮寵非所聞也固辭不受亮雖奔敗嶠每推崇之分兵給亮遣王愆期等要侃同赴國難侃恨不受顧命不許嶠用其部將毛寶說復固請侃許之遣督護龔登率兵詣嶠嶠於是列上尚書陳峻罪狀有衆七千灑泣登舟移告四方征鎮時侃雖許自下而未發復追其督護龔登嶠重與書由是侃激厲

遂率所統與嶠亮同赴京師戎卒六萬旌旗七百餘里
毛寶傳云祖約遣祖煥桓撫等欲襲湓口陶侃將自擊之
寶曰義軍恃公公不可動寶請討之乃使寶行先是桓宣
背約南屯馬頭山為煥撫所攻求救於寶寶兵少器仗濫
惡為煥撫所敗中箭貫髀徹鞍使人蹋鞍拔箭血流滿鞞
夜還救宣至宣營而煥撫退

四年^已冬十二月右將軍郭默害平南將軍江州刺史劉胤
太尉陶侃帥眾討默 成帝紀

劉胤傳云蘇峻作亂溫嶠率眾而下留胤等守湓口事平
代嶠為平南將軍都督江州諸軍事領江州刺史假節胤
位任轉高矜豪日甚縱酒耽樂不恤政事大殖財貨是時
朝廷空罄百官無祿惟資江州運漕而胤商旅繼路以私

廢公有司奏免胤官書始下為郭默所害

五年^{庚寅}夏五月 綱目作正月疑誤 太尉陶侃擒郭默於尋陽斬之 同上

侃傳云發使上表討默與王導書曰郭默殺方州即用為
方州害宰相便為宰相乎導答曰默居上流之勢加有船
艦成資故苞含隱忍使其有地一月潛嚴足下軍到是以
得風發相赴豈非遵養時晦以定大事者耶侃省書笑曰
是乃遵養時賊也侃既至默將宗侯縛默父子五人及張
丑詣降侃斬默等詔侃都督江州領刺史

咸康六年^{庚子}春正月以庾翼都督江荆等軍州事 通鑑綱目

庾翼傳云翼以帝舅年少超居大任遐邇屬目慮其不稱
翼戎政嚴明經略深遠數年之中公私充實人情翕然稱

其才幹

康帝建元元年癸卯冬十月以車騎將軍庾冰都督荆江司雍

益梁六州諸軍事江州刺史康帝紀

庾冰傳云弟翼當伐石季龍於是以本號除都督諸州軍事領江州刺史

二年甲辰冬十一月據帝紀庾冰卒詔翼復督江州翼繕修軍器

大佃積穀以圖後舉通鑑綱目

穆帝永和元年乙巳秋七月持節都督江州刺史庾翼卒穆帝紀

翼傳云子方之爰之為桓溫所廢並遷徙於豫章

四年戊申冬十二月豫章人黃韜聚眾數千寇臨川太守庾條

討平之同上

庾條傳云為冠軍將軍臨川太守豫章黃韜自稱孝神皇

帝臨川人李高為相聚黨數百人乘犢車衣皂袍攻郡縣

條討平之

哀帝興寧元年癸亥冬十一月張駿殺江州督護趙毘以叛江

州刺史桓沖討斬之哀帝紀

桓沖傳云溫破姚襄獲襄將張駿楊凝等徙於尋陽沖在

江陵未及之任而駿率其徒五百人殺江州督護趙毘掠

武昌府庫將妻子北叛沖遣將討獲之

孝武帝寧康元年癸酉秋七月以桓沖都督揚豫江州軍事通

鑑綱目

沖傳云沖既代溫居任盡忠王室或勸誅除時望沖不從

太元十年乙酉秋七月秦太子宏來奔處之江州同上

安帝隆安二年戊戌春二月以王愉都督江豫州軍事秋七月

王恭殷仲堪及南郡公桓元舉兵反八月楊佺期及元奄

至湓口王愉奔臨川元追獲之九月恭司馬劉牢之執恭

以降斬之以桓元為江州刺史同上

殷仲堪傳云使楊佺期以舟師五千為前鋒桓元次之仲

堪率兵二萬相繼而下佺期元至湓口王愉奔臨川元遣

偏軍追獲之聞劉牢之反恭乃迴師屯蔡洲元從兄脩告

會稽王道子曰若許佺期以重利無不倒戈於仲堪者道

子納之乃以元為江州佺期為雍州黜仲堪為廣州仲堪

恚被貶退使徇於軍曰若不各散而歸大軍至江陵當悉

戮餘口仲堪將劉系先領二千人隸佺期率眾而歸元等

大懼追仲堪至尋陽及之遂於尋陽結盟元為盟主臨壇

歃血並不受詔申理王恭求誅劉牢之譙王尚之等朝廷
深憚之詔仲堪還復本位

四年庚子春三月詔桓元都督荆江八州軍事荆江州刺史同上

桓元傳云表求領江荆二州詔以元都督荆襄雍秦梁益

寧七州後將軍荆州刺史假節以桓脩為江州刺史元上

疏固爭江州於是進督八州復領江州刺史樹用腹心兵

馬日盛屢上疏求討孫恩外託勤王實欲觀釁而進以桓

偉為江州鎮夏口遣桓振皇甫敷馮該等戍湓口桓偉為江州綱

目事在五年

元興元年壬寅春正月以後將軍元顯為驃騎大將軍征討大

都督鎮北將軍劉牢之為前鋒前將軍譙王尚之為後部

以討桓元二月遣兼侍中齊王柔之以騶虞幡宣告荆江
二州三月劉牢之叛降王師敗績元顯遇害

安帝紀

二年癸卯冬十二月桓元篡位以帝為平固王

縣名屬南康郡今隸贛州蒙

塵於尋陽

同上

三年甲辰春三月桓元至尋陽逼帝西上劉毅等率兵追之夏

四月何無忌等及元兵戰於桑落洲

江州圖經九江始於鄂陵終於桑落大

破之五月桓誅帝復位

通鑑綱目

劉毅傳云桓元既西走劉裕以毅為冠軍將軍與何無忌
劉道規躡元元眾大潰燒輜重夜走元將郭銓劉雅等襲
陷尋陽毅遣武威將軍劉懷肅討平之後桓振桓謙復聚
眾毅為振所敗退次尋陽坐免官尋原之毅復與道規發
尋陽桓亮自號江州刺史遣劉敬宣擊走之

何無忌傳云武陵王遵承制以無忌為輔國將軍以會稽
王道子所部精兵悉配之南追桓元與振武將軍劉道規
俱受冠軍將軍劉毅節度元留其龍驤將軍何澹之前將
軍郭銓江州刺史郭昶之守湓口無忌等次桑落洲澹之
等率軍來戰澹之常所乘舫旌旗甚盛無忌謂道規曰今
眾寡不敵戰無全勝澹之雖不居此舫取則易獲因縱兵
騰之可一鼓而敗也道規從之遂獲賊舫因傳呼曰已得
何澹之矣賊中驚擾道規乘勝徑進無忌又鼓譟赴之澹
之潰進據尋陽

義熙元年乙巳春正月劉毅等擊破馮該於豫章口夏五月劉
毅何無忌討滅桓元餘黨荆湘江豫皆平

同上

按劉毅傳云毅率無忌道規等諸軍破馮該於豫章口

推鋒而進遂入江陵附錄此條見春秋傳所云豫章去江陵甚近也

六年庚戌春二月盧循寇南康廬陵豫章陷之三月江荆都督何無忌討徐道覆戰敗死之夏五月豫州都督劉毅及盧循戰於桑落洲敗績秋七月盧循退還尋陽劉裕遣兵追之冬十二月劉裕及盧循戰於左里大破之循及道覆南走裕遣將軍劉藩等追之同上

通鑑紀事云初徐道覆使人伐船材於南康山至始興賤賣之船材大積而人不疑至是悉取以裝艦旬日而辦盧循自始興寇長沙道覆寇南康廬陵豫章諸守相皆委任奔走道覆順流而下安成公何無忌自尋陽引兵拒盧循長史鄧潛之諫曰循兵艦大盛勢居上流宜決南塘守城

以待之彼必不敢捨我遠下俟其疲老然後擊之參軍殷闡曰循所將皆三吳舊賊百戰餘勇始興溪子拳捷善鬪宜留屯豫章徵兵屬城兵至合戰未晚也無忌不聽與徐道覆遇於豫章賊令疆弩數百登西岸小山邀射之西風暴急飄無忌所乘小艦向東岸賊以大艦逼之衆遂奔潰無忌厲聲曰取我蘇武節來賊衆雲集握節而死劉毅聞循入寇將拒之而疾作旣瘳將行劉裕遺書曰賊新獲利其鋒不可輕今脩船垂畢當與弟同舉又遣劉藩諭止之毅怒投書於地帥舟師二萬發姑熟與循戰於桑落洲大敗棄船以數百人步走初循至尋陽聞裕已還猶不信旣破毅乃得審問與其黨相視失色循欲退還尋陽攻取江陵據二州以抗朝廷道覆謂宜乘勝徑進固爭之循猶豫

累日乃從之秋七月循自蔡洲南還尋陽裕使輔國將軍王仲德等帥眾追循江州刺史庾悅以鄱陽太守虞丘進為前驅屢破循兵進據豫章絕循糧道道覆帥眾三萬趣江陵劉道規使劉遵別為遊軍自拒道覆於豫章口前驅失利遵自外橫擊大破之斬首萬餘級赴水死者殆盡道覆單舸走還湓口裕軍雷池循道覆帥眾數萬塞江而下裕以勁弩射循軍循艦泊西岸岸上軍投火焚之循兵大敗走還尋陽將趣豫章乃悉力柵斷左里裕軍至不得進將戰所執麾竿折幡沉於水眾並恠懼裕咲曰往年覆舟之戰幡竿亦折今者復然賊必破矣即攻柵而進循兵雖殊死戰弗能禁循單舸走所殺及投水死者萬餘人納其降附宥其逼略遣劉藩孟懷玉輕軍追之

七年

辛亥

夏四月詔劉毅兼督江州軍事

同上

毅傳云轉衛將軍開府儀同三司江州都督毅上表謂宜解軍府移鎮豫章處十郡之中屬簡惠之政以及數年可有生氣尋陽接蠻可即州府千兵以助郡戎於是解江州刺史庾悅毅移鎮豫章遣其親將趙恢領千兵守尋陽

十二年

丙辰

春正月太尉劉裕自加都督二十二州軍事

通鑑

綱目

按張九韶云東晉以來南北分爭州郡不常迨宋受晉禪有州二十二其八曰江州治尋陽

宋

文帝元嘉三年

丙寅

夏五月以檀道濟為征南大將軍開府儀

同三司江州刺史

南史文帝紀

十年癸酉冬十一月宋謝靈運有罪誅

通鑑綱目

謝靈運傳云文帝以為臨川內史在郡遊放不異永嘉為有司所糾遣使隨州從事鄭望生收靈運靈運與兵叛逸為詩曰韓亡子房奮秦帝魯連恥本自江海人忠義感君子追討擒之送廷尉論正斬刑上愛其才降死徙廣州後棄市

十三年丙子春三月殺江州刺史永修公

永修縣漢中平立

檀道濟

豫

章書

十七年

庚辰

冬十月以彭城王義康為江州刺史蕭斌為諮議

參軍領豫章太守使將軍蕭承之將兵防守

通鑑綱目

二十二年

乙酉

冬十二月廢義康為庶人徙安成郡以沈邵為

安成相領兵防守

同上

二十四年

丁亥

冬十月胡誕世據豫章反

同上

胡藩傳云藩第十六子誕世欲奉庶人義康交州刺史檀和之至豫章討平之

三十年

癸巳

夏四月江州刺史武陵王駿舉兵討逆劾宋人立

駿

同上

沈慶之傳云元凶弒逆孝武遣慶之引諸軍慶之曰蕭斌婦人不足數其餘將帥並易與耳今輔順討逆不憂不濟也孝武至尋陽慶之及柳元景等並勸即大位

孝武帝孝建元年

甲午

春二月江州刺史臧質以南郡王義宣

舉兵反夏宋主遣兵討質誅之

同上

臧質傳云質自謂人才足為一世英傑始聞國禍便有異圖以義宣凡闇易制欲外相推奉以成其志孝武遣撫軍

將軍柳元景統王元謨等屯梁山洲築壘待之義宣遣腹
心劉謐之就質陳軍城南元謨悉精兵出戰薛安都騎軍
前出垣護之督諸將繼之乃大潰質走至尋陽焚府舍載
妓妾入南湖摘蓮噉之追兵至以荷覆頭沈於水出鼻軍
士鄭俱兒望見射之中心兵刃亂至腹胃纏縈水草隊主
裘應斬質傳首建業

明帝泰始元年乙巳冬十一月江州刺史晉安王子勛舉兵尋
陽同上

子勛傳云大明七年為江州刺史加都督八年改授雍州
未拜而孝武崩還為江州廢帝誅何邁使八座奏子勛與
邁通謀遣朱景送藥賜死景至湓口長史鄧琬等奉子勛
起兵以廢立為名明帝定亂進子勛車騎將軍開府儀同

三司琬等不受命

宋書鄧琬傳云安成太守劉襲舉郡奉順琬遣龍驤將軍
廖琰率數千人并發廬陵白丁攻襲襲與郡丞檀玠拒戰
玠臨陣見殺襲棄郡走琰鹵掠而退襲復出據郡時齊王
率眾東北征討世子蹟為南康贛令琬遣使收世子蕭欣
祖桓康等奉世子長子奔竄草澤募得數百人攻郡出世
子世子自號寧朔將軍與南康相沈用之等據郡起義琬
徵始興相殷孚為御史中丞并令率郡人俱下孚眾盛世
子避之揭陽山琬遣戴凱之為南康相世子率眾攻之凱
之敗走世子遣幢主檀文起千人戍西昌與襲相應琬又
遣廖琰與其中兵參軍胡昭等築壘西昌堅壁相守琬召
豫章太守劉衍以為右將軍中護軍殷孚代為豫章太守

督上流五郡以防襲等孚既去始興以郡五官掾譚伯初
留知郡事士人劉嗣祖等斬伯初據郡琬遣始興太守韋
希真鷹揚將軍楊弘之領衆一千討嗣祖嗣祖亦遣衆出
南康與齊王世子合希真等以義徒彊盛住廬陵不敢進
二年^{丙午}春正月遣建安王休仁討江州晉安王子勛遂稱帝
三月沈攸之代將擊尋陽軍大破之八月宋臺軍克江州
殺子勛同上

子勛傳云卽僞位於尋陽年號義嘉備置百官四方響應
是歲四方貢計並詣尋陽及軍敗子勛見殺時年十一
沈攸之傳云殷孝祖爲前鋒都督失人情攸之內撫將士
外諧羣帥衆並安之時孝祖中流矢死建安王休仁屯虎
檻總統衆軍聞孝祖死遣寧朔將軍江方興龍驤將軍劉

靈各率三千人赴赭圻攸之乃率諸軍主詣方興推重并
慰勉之明日進戰自寅訖午大敗賊尋進號輔國將軍代
孝祖督前鋒諸軍事攸之進平尋陽遷中領軍

鄧琬傳云琬惶擾無計時張悅稱疾呼琬計事令左右伏
甲琬至謀斬晉安王封府庫以謝罪悅曰寧可賣殿下求
活邪因呼酒第二子詢提刀出餘人續至卽斬琬齎首詣
建安王休仁降

宋主昱元徽二年^{甲寅}夏五月江州刺史桂陽王休範舉兵反
攻建康右衛將軍蕭道成擊斬之六月荊州刺史沈攸之
等攻江州克之同上

休範傳云發自尋陽晝夜取道大雷戍主杜道欣馳下告
變朝廷震動齊高帝出次新亭壘屯騎校尉黃回僞降休

范置之左右回與越騎校尉張苟兒直前斬休範首持還左右並散晉熙王變自夏口遣軍平尋陽

攸之傳云休範舉兵襲都攸之謂僚佐曰桂陽今逼朝廷必聲言吾與之同若不顛沛勤王必增朝廷之惑於是遣

使受郢州刺史晉熙王變節度會休範平使乃還

順帝昇明元年

丁巳即元徽五年於七月始改

秋七月宋中領軍蕭道成弒

其主昱而立安成王準冬十一月沈攸之舉兵討蕭道成同上

豫章書云初道成以世子蹟為晉熙王變長史行郢州事修治器械以備攸之及徵蹟為左衛將軍乃薦司馬柳世隆自代攸之起兵蹟行至尋陽眾欲倍道趨建康蹟曰尋陽地居中流密邇畿甸若留屯湓口內藩朝廷外援夏口

保據形勝控制西南今日會此天所置也或以為湓口城小難固左中郎將周山圖曰今據中流為西方勢援不可以小事難之苟眾心齊一江山皆城隍也蹟乃奉變鎮湓口山圖斷取行旅船板以造樓櫓立水柵旬日皆辦道成聞之喜曰蹟真我子也以蹟為西討都督蹟啟山圖為軍副時江州刺史邵陵王友鎮尋陽蹟以為尋陽城不足固表移友同鎮湓口留江州別駕豫章胡諧之守尋陽按沈約宋書以攸之為反叛綱目獨書討者蓋其心雖未必純忠於宋而師出不為無名也明年攸之軍潰走死蕭齊代宋之勢遂成矣

齊

武帝永明三年

乙丑

春正月以大司農劉楷為交州刺史發南

康廬陵兵討李叔獻

叔獻本交州刺史既受命而斷割外國貢獻故討之

叔獻懼為

楷襲間道自湘州還朝

通鑑

十一年癸酉春正月以陳顯達為江州刺史

通鑑綱目

海陵王延興元年

甲戌即鬱林王隆昌元年及明帝建武元年也

秋九月宣城公鸞

殺鄱陽王鏘等七人

同上

晉安王子懋傳云子懋鎮尋陽延興元年聞鄱陽隨郡隆

二王見殺欲起兵與參軍周英防閤陸超之議事成則宗

廟獲安不成猶為義鬼董僧慧曰此州雖小孝武亦嘗用

之今以勤王之師橫長江指北闕以請鬱林之罪誰能對

之母阮在都遣書欲密迎上阮報同產弟于瑤之為計瑤

之馳告明帝遣中護軍王元邈平西將軍王廣之南北討

使軍主裴叔業與瑤之先襲尋陽子懋先已具船於稽亭

渚聞叔業得盜城乃據州自衛子懋部曲多雍土人皆踴

躍願奮叔業畏之遣于瑤之說子懋曰今還都必無過憂

政當作散官不失富貴也子懋既不出兵眾情稍阻中兵

參軍于琳之瑤之兄也說子懋賂叔業使琳之往因說叔

業取子懋叔業遣軍主徐元慶將四百人隨琳之入城子

懋笑謂之曰不意渭陽翻成梟鏡琳之以袖障面使人害

之

東昏侯永元元年

已卯

冬十一月太尉江州刺史陳顯達舉兵

反於尋陽加護軍將軍崔慧景平南將軍督眾軍南討十

二月甲申顯達至都宮城嚴警已酉斬顯達傳其首餘黨

盡平

南史

陳顯達傳云聞都下大相殺戮徐孝嗣等皆死遣兵襲江

州顯達懼禍十一月舉兵欲直襲建康以掩不備又遙指
郢州刺史建安王寶寅為主朝廷遣後軍將軍胡松等據
梁山顯達率衆數千人發尋陽與松戰於采石大破之都
下震恐十二月潛軍度取石頭顯達馬稍從步兵數百人
於西州前與臺軍戰再合大勝稍折手猶殺十餘人官軍
繼至顯達不能抗騎官趙潭注稍刺落馬斬之

二年

庚辰

冬十一月南康王寶融為荊州刺史戊午蕭衍表勸

南康王稱尊號不許

豫章書

和帝中興元年

辛巳三月遙廢寶卷為涪陵王

秋

八月蕭衍克尋陽九月蕭

衍引兵東下留鄭紹叔守尋陽

通鑑綱目

豫章書云初東昏侯遣陳伯之鎮江州為吳子陽等聲援
子陽等既敗蕭衍謂諸將曰兵未必須實所聽威聲耳今

陳虎牙狼狽奔歸尋陽人情恟懼可傳檄定也乃搜俘囚
得伯之幢主蘇隆之厚加賜與使說伯之許即用為安東
將軍江州刺史伯之遣隆之返命雖許歸附而云大軍未
須遽下衍曰伯之意懷首鼠及其猶豫急往逼之計無所
出勢不得不降乃命鄧元起引兵先下楊公則徑掩柴桑
衍與諸將以次進路元起將至尋陽伯之退保湖口留陳
虎牙守湓城衍至尋陽伯之束甲請罪初新蔡太守席謙
父恭祖為魚復侯子響所殺謙從伯之鎮尋陽聞衍東下
曰我家世忠貞有隕不貳伯之殺之衍以伯之刺江州九
月衍留驍騎將軍鄭紹叔守尋陽與伯之引兵東下謂紹
叔曰卿吾之蕭何寇怕也前途不捷我當其咎糧運不繼
卿任其責比克建康紹叔督江湘糧運未嘗乏絕

南齊蕭穎胄傳云穎胄弟穎孚在京師廬陵人修靈祐

景智竊將南上於西昌縣山中聚兵二千人襲郡內史謝

入湘州南道援之僧簡進尅安成仍以為輔國將軍安成

內史拜穎孚為冠軍將軍廬陵內史合二郡兵出彭蠡口

東昏侯遣軍主彭益劉希祖三千人受江州刺史陳伯之

節度南討二郡義兵仍進取湘州南康太守王丹保郡應

盆等穎孚聞兵至望風奔走前內史謝篡復還郡劉希祖

至安成攻戰七日城陷僧簡見殺希祖仍為安成內史穎

孚收散卒據西昌謝篡又遣軍攻之穎孚敗奔尋卒後修

靈祐合餘眾攻篡篡復敗走豫章希祖亦以郡降

梁

武帝天監元年壬午和帝於四月被廢夏五月江州刺史陳伯之舉兵

反以王茂為征南將軍江州刺史率眾討之六月陳伯之

奔魏江州平武帝紀

伯之傳云伯之在州用鄧繕為別駕戴承忠為記室參軍

河南褚緞都下之薄行者投伯之大見親狎及伯之鄉人

朱龍符為長流參軍並乘伯之愚闇恣行姦險伯之子虎

牙時為直閣將軍武帝手疏龍符罪親付虎牙封示伯之

又遣代江州別駕鄧繕伯之並不受命繕於是日夜說伯

之云臺家府庫空竭無復器仗三倉無米此萬世一時機

不可失緞承忠等每贊成之伯之使緞詐為蕭寶寅書以

示僚佐於聽事前為壇殺牲以盟豫章太守鄭伯倫起郡

兵拒守程元冲既失職於家合率數百人使伯之典籤呂

孝通戴元則為內應伯之每日常作伎日晡輒卧左右仗身皆休息元冲因其懈弛從北門入徑至聽事前伯之聞叫自率出盪元冲力不能敵走逃廬山伯之遣使還報虎牙兄弟虎牙等走盪台盪台人徐文安莊興紹張顯明邀擊之不能禁反見殺武帝遣王茂討之伯之敗走間道亡命出江北與虎牙及褚絹俱入魏伯之於五年復叛魏歸梁

普通三年

壬寅

冬十一月梁西豐侯

西豐今臨川縣地

正德奔魏既而

逃歸

通鑑綱目

大同元年

乙卯

冬十二月鄱陽鮮于琮反內史陸襄討平之

豫

章書

陸襄傳云大通七年為鄱陽內史先是郡人鮮于琮服食修道法常入山採藥拾得五色幡旒又於地中得石璽竊

怪之琮先與妻別室望琮所處常有異氣益以為神大同元年遂結門徒殺廣晉令王筠號上願元年署置官屬其黨轉相誑惑有眾萬餘人將出攻郡襄先已率人吏修城隍為備及賊至破之生獲琮

八年

壬戌

春正月安成妖人作亂三月江州司馬王僧辯討平

之

通鑑綱目

梁書張綰傳云安成人劉敬宮

綱目作躬

挾妖道聚黨攻郡內

史蕭悅棄城走賊轉寇南康廬陵屠破縣邑有眾數萬人

進寇豫章新淦縣南中久不習兵革吏民恒擾奔散或勸

綰宜避其鋒

時為豫章內史

綰修城隍設戰備募召勇敢得萬餘

人刺史湘東王遣司馬王僧辯帥兵討賊受綰節度旬月

間賊黨悉平

大清二年

戊辰

秋八月鄱陽王範密啓侯景謀反不報冬十月

侯景襲譙州執刺史豐城侯泰

範之子

十一月江州刺史當

陽公大心入援西豐公大春新淦公大成入援敗績侯景

擒大春十二月衡州刺史韋粲至廬陵舉兵入援

豫章書

韋粲傳云帝召還爲散騎常侍至廬陵聞侯景作逆便簡

閱部下倍道赴援至豫章就內史劉孝儀謀之孝儀曰必

如此當有勅安可輕信單使妄相驚動時孝儀置酒粲怒

以杯抵地曰賊已渡江便逼宮闕水陸阻斷何暇有報假

令無勅豈得自安韋粲今日何情飲酒卽馳馬出會江州

刺史當陽公大心遣使要粲粲乃分麾下配第八弟助第

九弟警爲前軍粲馳見大心曰上游藩鎮江州去都最近

殿下情計實宜在先但中流任重當須應接不可闕鎮今

宜張軍聲勢移鎮湓城遣偏將賜隨於事便足大心然之

遣中兵柳昕帥兵二千隨粲粲留家累於江州以輕舸就

路粲外弟司州刺史柳仲禮亦帥步騎萬餘人至橫江粲

卽送糧仗給之并散私金帛以賞其戰士先是鄱陽王範

亦自合肥遣西豫州刺史裴之高與其世子嗣帥江西之

衆赴都屯於張公洲待上流諸軍至是之高遣船渡仲禮

與粲合軍

明年粲及侯景戰敗死之

三年

己巳五月

冬十月梁豫章內史莊鐵叛襲江州敗走

通鑑綱目

豫章書云初歷陽太守莊鐵帥衆歸尋陽王大心大心以

爲豫章內史鐵至郡卽叛推觀寧侯爲主永範之弟也鐵

引兵襲尋陽大心遣其將徐嗣徽逆擊破之鐵走建昌光

遠將軍韋約邀擊之鐵失其母弟妻子單騎還南昌

簡文帝大寶元年庚午春正月梁始興太守陳霸先進軍南康

邵陵王綸自鄱陽進至九江引兵西上假黃鉞都督承制

夏四月湘東王繹移檄討侯景五月侯瑱殺莊鐵據豫章

六月高州刺史李遷仕反馮寶妻洗氏討敗之遷仕走保

寧都秋七月侯景陷江州及豫章冬十月侯景殺南康王

會理同上

豫章書云陳霸先發始興至大庾嶺蔡路養南康將二萬

人軍南楚以拒之路養妻姪蕭摩訶年十三單騎出戰無

敢當者杜僧明馬被傷霸先救之授以所乘馬僧明上馬

復戰衆軍因而乘之路養大敗脫身走霸先進軍南康湘

東王繹承制授霸先明威將軍交州刺史六月刺史李遷

仕據大臯口遣使召高涼太守馮寶妻洗氏曰刺史被召

援臺乃稱有疾鑄兵聚衆而後召君此必欲質君以發君

之兵也願且無往以觀其變數日遷仕果反遣主帥杜平

鹵將兵入瀨石城魚梁以逼南康霸先使周文育擊之洗

氏謂寶曰平鹵與官軍相拒勢未得還遷仕在州無能爲

也君若自往必有戰鬪宜遣使卑辭厚禮告之曰身未敢

出欲遣婦參彼必喜而無備我將千餘人步擔雜物唱言

輸賂得至柵下破之必矣寶從之遷仕果不設備洗氏襲

擊大破之遷仕走保寧都文育亦擊走平鹵據其城洗氏

與霸先會於瀨石還謂寶曰陳都督非常人也甚得衆心

必能平賊君宜厚資之

南史侯瑱傳云瑱隨範徙鎮湓城俄而範及嗣皆卒瑱領

其眾依豫章太守莊鐵鐵疑之瑱懼不自安詐引鐵謀事
因刃之據豫章後降於侯景將于慶

尋陽王大心傳云侯景將任約略地至湓城大心遣司馬
韋質拒戰敗績時帳下猶有勇士千餘人咸說曰既無糧
儲難以守固若輕騎往建州以圖後舉策之上也其母陳
淑容不從大心乃止遂與約和二年見害

黃法氈傳云陳武帝將踰嶺入援建鄴李遷仕作梗中途
武帝命周文育屯西昌法氈遣兵助文育時法氈出頓新
淦縣景遣行臺于慶來襲法氈敗之

二年辛未春二月陳霸先討李遷仕殺之秋七月于慶自鄱陽
遷豫章侯瑱拒之走江州王僧辯克湓城江州刺史陳霸
先引兵會之八月侯景廢梁主綱立豫章王棟同上

杜僧明傳云李遷仕與寧都人劉孝尚并力將襲南康陳
武帝令僧明與周文育等拒之相持連戰百餘日卒擒遷
仕送武帝及帝下南康留僧明頓西昌督安成廬陵二郡
軍事

豫章書云二年正月新吳余孝頃舉兵拒侯景新吳縣屬豫章隋省

入南昌縣景遣于慶攻之不克六月孝頃遣兄子僧重將兵救

鄱陽于慶走還豫章復走江州據鄆默城王僧辯乘勝下
湓城陳霸先帥所部三萬人將會之屯於巴丘屬廬陵郡西軍

乏食霸先有糧五十萬石分三十萬石以資之八月僧辯
前軍襲于慶慶棄鄆默城走范希榮亦棄尋陽走湘東王
繹命僧辯頓尋陽以待諸軍之集

元帝承聖元年壬申是年十一月方即位改元春正月湘東王繹遣王僧辯

等東擊侯景 同上

豫章書二月僧辯諸軍發尋陽舳艫數百里陳霸先帥甲

士三萬舟艦二千自江南出湓口會僧辯於白茅灣築壇

歃血共讀盟文流涕慷慨三月僧辯等平侯景 景於四月伏誅

三年 甲戌十月元帝降魏被害 冬十一月王僧辯陳霸先等共奉江州刺

史晉安王方智為太宰承制 豫章書

敬帝紹泰元年 乙亥是年十月方改元 春二月晉安王自尋陽入建康

即梁王位 同上

太平元年 丙子 春正月梁遣兵擊侯瑱於湓城秋七月瑱詣闕

歸罪冬十二月以周迪為臨川內史 通鑑綱目

侯瑱傳云陳武帝誅王僧辯僧悳陰欲圖瑱而奪其軍瑱

知之盡收僧悳徒黨僧悳奔齊是時瑱據中流甚強又以

本事僧辯雖外示臣節未肯入朝初余孝頃為豫章太守

及瑱鎮豫章乃於新吳縣別立城柵與瑱相拒瑱留軍人

妻子於豫章令從弟齋知後事悉眾以攻孝頃自夏迄冬

弗能尅齋與其部下侯方兒不協方兒下攻齋掠瑱軍府

妓妾金玉歸於武帝瑱既失根本歸豫章豫章人拒之乃

趨湓城就其將焦僧度僧度勸瑱投齊瑱以武帝有大量

必能容已乃詣闕請罪武帝復其爵位

熊曇朗傳云侯方兒之反瑱巴山太守熊曇朗為謀主瑱

敗曇朗獲瑱馬仗子女甚多

周迪傳云侯景之亂迪宗人周續起兵臨川梁始興王蕭

毅以郡讓續迪召募鄉人從之每戰勇冠諸軍渠帥等殺

續推為主紹泰二年 即太平元年 領臨川內史

黃法氈傳云太平元年割江西四郡臨川安成豫章巴山置高州以法氈爲刺史鎮巴山後蕭勃歐陽頎來攻法氈破之

二年丁丑春二月梁蕭勃起兵廣州次於南康丞相陳霸先使周文育擊勃獲其將歐陽頎傅泰勃爲其下所殺同上

周文育傳云蕭勃將舉兵踰嶺詔文育督衆軍討之時新吳洞主余孝頃舉兵應勃遣其弟孝勸守郡城自出豫章據石頭勃使其子孜將兵與孝頃相會又遣別將歐陽頎頓軍苦竹灘傅泰據蹠口城在南康郡之北以拒官軍官軍船少

孝頃有舳艫三百艘艦百餘乘在上牢文育遣軍主焦僧度襲之悉取而歸仍於豫章立柵官軍食盡欲還文育不許使人遺周迪書約爲兄弟迪甚喜許饋以糧文育分遣老小乘故船舫沿流俱下燒豫章所立柵僞遁孝頃望之

大喜因不設備文育由間道信宿達芊韶築城饗士賊徒大駭歐陽頎乃退入泥溪作城自守文育遣嚴威將軍周鐵虎與長史陸山才襲頎擒之盛陳兵甲與頎乘舟而宴以巡傅泰城下因攻泰尅之蕭勃在南康聞之衆皆股慄其將譚世遠斬勃欲降爲人所害世遠軍主夏侯明徹持勃首以降蕭孜余孝頃猶據石頭武帝遣侯安都助文育攻之孜降孝頃退走新吳

陳

武帝永定元年

即太平二年十月始受禪改元

冬十月梁王琳及陳人戰敗

之獲其將周文育侯安都遂克江州同上

王琳傳云琳將張平宅乘一艦每將戰勝艦則有聲如野猪故琳戰艦千數以野猪爲名武帝遣將侯安都周文育

西漢志 卷二十九
等討琳仍受梁禪安都歎曰我其敗乎師無名矣逆戰禽
安都文育其餘無所漏惟以周鐵武一人背恩斬之

二年^{戊寅}春正月梁王琳伐陳次於白水夏五月琳伐臨川不

克秋八月侯安都周文育自湓城逃歸同上

琳傳云帶甲十萬練兵於白水浦屬湓城琳巡軍而言曰可

以爲勤王之師矣溫太真何人哉南江渠帥熊曇朗周迪
懷貳琳遣李孝欣樊猛與余孝頃同討之三將軍敗並爲
迪所囚安都文育等逃還建鄴

豫章書云新吳洞主余孝頃遣沙門道林說琳曰周迪黃
法氈皆依附金陵大軍若下必爲後患不如先定南川孝
頃請席卷所部以從下吏琳乃遣輕車將軍樊猛平南將
軍李孝欽平東將軍劉廣德將兵八千赴之使孝頃總督

三將屯於臨川故郡徵兵糧於迪以觀其所爲五月孝頃
等屯二萬軍於工塘連八城以逼迪迪懼請和并送兵糧
猛等欲受盟而還孝頃貪其利不許樹柵圍之由是不協
高州刺史黃法氈寧州刺史周敷合兵救迪敷自臨川故
郡斷江口分兵攻孝頃別城猛等不救而沒劉廣德乘流
先下故獲全孝頃等皆棄舟引兵步走迪追擊盡擒之送
孝頃及孝欽於建康歸樊猛於王琳孝頃之弟孝勸及子
公颺猶據舊柵不下詔周文育都督衆軍出豫章討之

三年^{己卯}夏五月北江州刺史熊曇朗殺都督周文育舉兵反

王琳遣其將常衆愛曹慶率兵援余孝勸六月儀同侯安
都敗衆愛等於左里獲琳從弟襲主帥羊曠等衆愛遁走
廬山人斬之傳首建鄴武帝紀

綱目云王琳遣將曹慶攻周迪敗之文育退據金口曇朗因其失利殺文育而併其眾周敷擊破之曇朗單騎奔巴山十一月琳聞陳高祖殂奉梁主莊出屯濡須口攻大雷陳遣侯瑱侯安都及徐度將兵禦之吳明徹夜襲湓城琳遣任忠擊明徹大破之引兵東下明年琳敗績與梁主莊皆奔齊文帝天嘉元年庚辰春二月遣太尉侯瑱鎮湓城三月江州刺史周迪平南中斬賊帥熊曇朗傳首建鄴秋九月周將獨孤盛領水軍趨巴湘與賀若敦水陸俱進太尉侯瑱自尋陽禦之文帝紀

三年壬午春二月江州刺史周迪舉兵應留異三月以安右將軍吳明徹為安南將軍江州刺史督眾軍南討秋九月周迪請降同上

綱目云初陳主徵迪出鎮湓城不至豫州太守周敷獨先入朝進號安西將軍給鼓吹女妓金帛還豫章迪不平陰與留異相結遣兵襲敷敷與戰破之閩州刺史陳寶應亦陰與異合乃以吳明徹為江州刺史督黃法氈周敷共討周迪

四年癸未春正月周迪走投陳寶應納之秋九月迪復寇臨川詔護軍將軍章昭達討平之同上

綱目云周迪眾潰奔晉安復越東興嶺在臨川郡南城縣界為寇護軍章昭達將兵討破之迪潛竄山谷民相與匿之雖加誅戮無肯言者

五年甲申冬十月周迪誘陳南豫州刺史周敷殺之通鑑綱目豫章書云周迪復出東興錢肅降吳州刺史陳詳兵大敗

西漢志 卷二十一
迪衆復振南豫州刺史周敷帥所部擊之至定州與迪對壘迪給敷曰吾昔與弟戮力同心豈規相害今願伏罪還朝因弟披露心腑先乞挺身共盟敷許之方登壇爲迪所殺

六年

乙酉

秋七月臨川太守駱牙斬周迪傳首建鄴

文帝紀

豫章書云遣都督程靈洗自鄱陽別道擊周迪破之迪與麾下十餘人竄山谷中後遣人潛出臨川市魚鮭臨川太守駱牙執之令取迪自効因使腹心勇士隨之入山其人誘迪出獵勇士伏道傷斬之

按陳書駱牙本傳牙以晉陵太守遷冠軍將軍臨川內史非太守也

宣帝太建五年

癸巳

冬十二月詔熊曇朗周迪等及王琳首並

還親屬以弘廣宥

宣帝紀

後主至德二年

甲辰

冬十一月使南平王嶷鎮江州

南史

禎明三年西配隋師濟江宜黃侯慧紀率將士三萬人船艦千餘沿江而下欲趣臺城遣南康太守呂肅將兵援巫峽以五條鐵鎖橫江肅竭其私財以充軍用

陳書列傳

隋

文帝開皇九年

乙酉

春正月滅陳獲其主叔寶

通鑑綱目

隋書王世積傳云平陳之役以舟師自蘄水趣九江晉王已平丹楊世積移書告諭陳江州司馬黃偁棄城遁世積至豫章太守徐璿廬陵太守蕭廉尋陽太守陸仲容巴山太守王誦安成太守王瓘鄱陽臨川守將並詣世積降韋洸傳云陳平拜江州總管率步騎二萬略定九江陳豫

西漢書 卷二十九
章太守徐璠據郡持兩端泐遣開府呂昂長史馮世基以兵相繼而進既至城下璠偽降夜率所部二千人襲擊昂昂與世基合擊大破之擒璠於陣

十年庚戌冬十一月樂安蔡道人饒州吳世華皆自稱大都督詔上柱國內史令越國公楊素討平之文帝紀

楊素傳云賊帥汪文進自稱天子據東陽署其徒蔡道人為司空守樂安進討平之

裴矩傳云奉詔巡撫嶺南汪文進等相聚作亂吳越道閉矩請速進至南康得兵數千人時俚帥王仲宣逼廣州遣其部將立九柵屯大庾嶺共為聲援矩進擊破之

煬帝大業十二年丙子冬十二月鄱陽林士弘稱楚帝據江南

通鑑綱目

江西大志云冬十月鄱陽賊帥操師乞自稱元興王建元始興攻陷豫章郡以其鄉人林士弘為大將軍詔治書侍御史劉子翊將兵討之師乞中流矢死士弘代統其眾與子翊戰於彭蠡湖子翊敗死士弘兵大振至十餘萬人十二月士弘自稱皇帝國號楚建元太平遂取九江臨川南康宜春等郡宜春置郡在大業初豪傑爭殺隋守令以郡縣應之其地北自九江南及番禺皆為所有

按煬帝本紀云鄱陽賊操天成舉兵反自號元興王建元始興攻陷豫章郡唐書林士弘傳則云隋季與鄉人操師乞起為盜師乞自號元興王建元天成據豫章蓋隋紀悞以年號為名而大志亦未覈僭元之實也

十三年丁丑即代王冬十二月蕭銑取豫章林士弘退保餘

干通鑑綱目

豫章書云方與賊帥張善安襲陷廬江郡因渡江歸林士
弘於豫章士弘疑之營於南塘上善安恨之襲破士弘焚
其郭郭而去士弘徙居南康蕭銑遣其將蘇胡兒襲豫章
克之士弘退保餘干

西江志卷第二十九

西江志卷第三十

武事二

唐

高祖武德四年

戊寅

冬十月蕭銑江州總管蓋彥舉以五州降

豫章書

唐書蕭銑傳云僞江州將蓋彥舉以城降趙郡王孝恭李
靖直逼其都

五年

己卯

冬十月楚王林士弘卒其眾遂散

通鑑綱目

林士弘傳云士弘弟鄱陽王藥師以兵二萬圍循州總管
王世略破斬之士弘請降王戎士弘黨亦獻南昌地詔戎為
南昌州總管士弘復遁保安城山袁人相聚應之為張善
安所察以兵赴討會士弘死黨乃解

太平寰宇記云平林士弘改洪州總管為都督領洪吉虔
饒撫南平六州

六年庚辰春三月唐前洪州總管張善安反冬十二月唐安撫
使李大亮討張善安執之同上

張善安傳云善安掠孫州武德五年以洪州南昌縣置孫州執總管王戎

會李大亮兵至為開曉禍福答曰善安初不反為部下誑
誤降易耳恐不免奈何大亮曰總管定降吾固不疑因獨
入其陣與善安握手語乃大喜將數十騎詣大亮營大亮
引入命壯士執之騎皆驚引去悉兵來戰大亮諭以善安
自歸無庸鬪其黨罵曰總管賣我遂潰送善安京師稱不
與輔公柘謀赦之公柘破得其書遂伏誅

太宗貞觀十八年甲辰秋七月上將征高麗勅將作大監閻立

德等詣洪饒江三州造船四百艘以載軍糧豫章書

二十二年戊申秋八月命洪州造海船及雙舫同上

高宗龍朔二年壬戌滕王元嬰為洪州都督同上

按涂廩豫章記滕王元嬰除洪州在顯慶元年非龍朔
也

中宗嗣聖六年己丑武后永昌元年夏四月太后殺鄱陽公譔等十二
人通鑑綱目

豫章書云譔謀迎中宗於廬陵故誅

按綱目嗣聖二年三月中宗已從廬陵遷房州

明皇開元十五年丁卯張九齡為洪州都督豫章書

肅宗至德二載丁酉春二月江南採訪使李成式討永王璘璘

敗走死通鑑綱目

永王璘傳云璘領山南江西嶺南黔中四道節度使

至德元載

分江南西道領豫章諸郡

其子襄城王陽剛鷲有勇樂於倡亂勸璘取

金陵即引舟師東下會有旨降璘庶人諸將遂割臂反盟

渾惟明奔江寧馮季康奔白沙季廣琛兵六千亦遁成式

遂進射傷中肩軍潰璘與高仙琦奔鄱陽司馬陶備閉城

璘怒焚城門以入收其庫兵掠餘干將走嶺表江西採訪

皇甫侁兵追及之戰大庾嶺璘中矢被執侁殺之傷為亂

兵所害仙琦逃去

乾元元年

戊戌

冬十二月戶部尚書李峘都統淮南江東江西

節度使

豫章書

上元元年

庚子

冬十一月江淮都統劉展反

通鑑綱目

豫章書云冬十一月劉展都統淮南江西浙西節度使詔

舊都統李峘圖展展反峘奔洪州展遣其將傅子昂屯南

陵將下江州徇江西明年正月展伏誅又辯劉展亂紀云

淮南東道浙江西道凡二十二州置都統節度下稱以展

為都統江南淮南節度使下又稱三道皆發吏申圖籍按

舊李峘傳峘都統淮南江南江西節度使展既代峘其所

統亦三道耳淮南者東道揚楚滁和舒廬濠壽八州也江

南者昇潤常蘇湖杭睦七州也江西者洪虔江吉袁撫信

七州也

信州於乾元元年置

凡二十二州亂紀誤以二為三又脫江

南西道字耳

寶應元年

壬寅

秋九月台州賊袁晁陷信州

豫章書

綱目云代宗廣德元年李光弼部將張伯儀討平袁晁

代宗大曆八年

癸丑

秋九月嶺南將哥舒晃殺節度使呂崇貴

詔江西觀察使路嗣恭兼嶺南節度使討之 唐書

德宗建中三年 壬戌冬十月以曹王臯為江西節度使 通鑑綱目

曹王臯傳云至豫章大令將吏曰有功未申與懷器謀不發者皆自言得裨校伊慎李伯潛劉旻悉補大將擢王諤為中軍以馬彞許孟容為幕府治戰艦裒兵二萬以士二千五百委慎等教之自將五百人教以秦兵團力法聯其賞罰弛張如一乃約以五百人擊慎卒二千五百莫能當其鋒即盡以教之初慎嘗從李希烈平襄州至是希烈懼為臯用即反間德宗信之將誅慎臯請赦之會與賊夾江陣臯勉慎立功以所乘馬及器鎧賜之使將先鋒斬賊數百級乃免

按伊慎所斬之賊即李希烈部將韓霜露之兵豫章書以為江中羣盜者誤

憲宗元和二年 丁亥冬十月削李錡官爵屬籍徵江西兵出信州討之 豫章書

按李錡之反豫章書誤入元年今從唐書帝紀改正

宣宗大中十二年 戊寅夏六月江西軍亂逐觀察使鄭憲冬十

月以韋宙為江西觀察使討亂軍平之 通鑑綱目

豫章書云江西都將毛鶴叛逐觀察使鄭憲詔以光祿卿

韋宙為江西觀察使 宙父丹有惠政於江西發鄰道兵討毛鶴宙過

襄州徐商遣都將韓季友帥捕盜將從行宙至江州季友

請自間道陸行比明至洪州即日討平之宙奏留捕盜將

二百人於江西以季友為都虞候

懿宗咸通六年

酉

夏五月置鎮南軍於洪州

豫章書

楊收傳云自大中以來南蠻火邕州掠交趾調人往戍死者十七收議募豫章士三萬置鎮南軍以拒蠻又峙食汎舟以餉南海

僖宗乾符四年

丁酉

四月江西賊柳彥璋陷江州執其刺史陶

祥高安制置使鍾傳陷撫州十二月江州刺史劉秉仁及柳彥璋戰敗之

帝紀

豫章書云柳彥璋襲陷江州使陶祥上表彥璋亦自附降狀勅以彥璋為右監門將軍令散眾赴京師以左武衛將軍劉秉仁為江州刺史彥璋不從以戰艦百餘立水寨於湓江剽掠如故秉仁乘驛之官單舟入水寨賊出不意即迎拜秉仁斬彥璋散其眾

鍾傳傳云王仙芝猖狂江南大亂眾推傳為長乃鳩夷獠依山為壁至萬人自稱高安鎮撫使仙芝遣柳彥璋掠撫州不能守傳入據之言諸朝詔即拜刺史

五年

戊戌

春二月王仙芝餘黨陷洪州黃巢陷虔吉饒信等州

通鑑綱目

唐紀云二月王仙芝伏誅其將王重隱陷饒州刺史顏標死之江西賊徐唐莒陷洪州四月饒州將彭令璋克饒州自稱刺史徐唐莒伏誅

黃巢傳云宋威斬仙芝傳首尚讓率潰黨歸巢推為王號衝天大將軍建元王霸驅河南山南民十餘萬掠淮南詔以曾元裕為招討使更拜張自勉北面行營招討使時巢兵在江西者為高駢所破詣天平軍乞降即叛去轉寇浙

東駢遣將張潏梁纘攻破之復踰江西破虔吉饒信等州
刊山開道七百里直趨劍州

六年^{亥巳}冬十月江西招討使曹全晟與山南東道節度使劉

巨容合兵破黃巢於荆門全晟代還賊勢復振陷鄂州掠

饒信等十五州衆至二十萬

同上

廣明元年^{子庚}正月淮南將張潏及黃巢戰於大雲倉敗之四

月潏克饒州五月潏及巢戰於信州死之

帝紀

豫章書云張潏渡江擊賊帥王重霸降之屢破黃巢軍巢
退保饒州別將常宏以其衆數萬降潏攻饒州克之巢走
屯信州遇疾疫卒徒多死潏急擊之巢以金啗潏且致書
請降於高駢求保奏駢欲誘致之許為求節鉞時昭義感
化義武等軍皆至淮南駢恐分其功乃奏賊不日當平不

煩諸道兵請悉遣歸賊訶知諸道兵已北渡淮乃告絕於

駢且請戰駢怒令潏擊之兵敗潏死巢勢復振

中和二年^{壬寅}秋七月以鍾傳為江西觀察使

豫章書云鍾傳逐江西觀察使高茂卿據洪州朝廷以傳
為江西觀察使從高駢之請也傳既去撫州南城人危全
諷復據之又遣其弟子昌據信州

光啟元年^{乙巳}正月南康賊盧光稠陷虔州

帝紀

豫章書云盧光稠陷虔州自稱刺史以其里人譚全播為
謀主考異云歐陽修五代史曰盧光稠譚全播皆南康人
光稠狀貌雄偉無他材能全播勇敢有識略然全播常奇
光稠為人唐末羣盜起全播聚衆立光稠為帥是時王潮
攻陷嶺南全播攻潮取其虔韶二州十國紀年曰全播推

光稠為之謀主所向克捷光啓初據虔州光稠自稱刺史
天復中陷韶州使其子延昌守之按新紀云光啓元年正
月光稠陷虔州天復二年陷韶州五代史以為同時取虔
韶二州誤也今從新紀

綱目云光啓元年正月詔招撫秦宗權責租賦於光州王
緒不能給宗權發兵擊之緒懼悉舉光壽二州兵五千人
渡江轉掠江洪虔州陷汀漳前鋒將擒緒而奉王潮

昭宗景福元年壬子夏六月劉建鋒馬殷收餘眾走洪州通鑑

綱目

劉建鋒傳云孫儒之敗建鋒殷收散卒轉寇江西有眾七
千推建鋒為主殷為前鋒張佶為謀主略洪虔數州眾遂
十餘萬

乾寧四年丁巳秋八月鍾傳進逼吉州刺史周琲奔襄陽豫章

書

天復元年辛酉冬十二月江西節度使鍾傳取撫州通鑑綱目

鍾傳傳云傳率兵圍撫州天火其城士民謹驚諸將請急
攻之傳曰乘人之險不可乃祝曰全諷之罪無為害民火
即止全諷聞之謝罪聽命以女女傳子匡時傳以匡時為
袁州刺史擊馬殷又以彭玕為吉州刺史玕健將也傳倚
以為重

昭宣帝天祐昭宗三年丙寅夏四月鎮南節度使鍾傳卒子匡

時為留後秋九月楊渥行密取洪州同上

鍾傳傳云天祐三年傳卒匡時自立為節度觀察留後次

子匡範實錄作延圭十為江州刺史怨兄立挈江州附淮

南因言兄結汴人圖揚州渥使秦裴攻匡時圍洪州匡時
城守不出凡三月城陷淮軍大掠三日止執匡時及司馬
陳象歸揚州渥切責匡時頓首請死渥哀赦之斬象於市
彭玕既失援厚結馬殷且觀虛實使者還曰殷將校輯睦
未可圖也遂歸欵

豫章書云七月秦裴至洪州軍於蓼州諸將請阻水立寨
裴不從匡時遣其將劉楚據之諸將以咎裴裴曰匡時驍
將獨楚耳若帥衆守城不可猝拔吾故以要害誘致之未
幾破寨執楚遂圍洪州饒州刺史唐寶請降九月裴拔洪
州俘匡時等五千人以歸楊渥自兼鎮南節度使以裴爲
洪州制置使

四年

丁卯四月
梁代唐

春正月黑雲都指揮使呂師周將兵屯上高

遂出奔於湖南夏五月楚王殷遣兵會吉州刺史彭玕攻
洪州不克冬十二月遣兵攻信州刺史危仔倡乞師於吳
越十國春秋吳世家

按路振九國志謂師周爲行密所疑奔湖南實則疑之
者乃楊渥非行密也

豫章書云張顥徐溫使三將

朱思勳范
遇陳璠

從秦裴擊江西因

戍洪州誣以謀叛命別將陳祐往誅之祐間道兼行六日
至洪州微服懷短兵徑入秦裴帳中裴大驚祐告之故乃
召思勳等飲酒祐數以罪執斬之

按歐陽史謂顥溫誅陳璠等即在楊渥庭中實則璠等
死於洪州非廣陵也今從十國紀年及十國春秋

五代

唐天祐六年

已巳唐亡於四年晉岐淮南猶稱唐天祐六年乃梁之開平三年也

秋七月淮南

盡取江西地

通鑑綱目

豫章書云六月危全諷自稱鎮南節度使攻洪州楚馬殷遣指揮使苑玫會袁州刺史彭彥章圍高安七月淮南遣招討使周本擊全諷全諷於象牙潭營柵臨溪亘數十里本隔溪布陣先使羸兵嘗敵全諷兵涉溪追之本乘其半濟縱兵擊之全諷兵大潰溺水死者甚衆本分兵斷其歸路擒全諷及將士五千人乘勝克袁州執刺史彭彥章進攻吉州歙州刺史陶雅使其子敬昭及都指揮使徐章將兵襲饒信信州刺史危仔倡請降饒州刺史唐寶棄城走行營都指揮使米至誠都尉呂師造等敗苑玫於上高吉州刺史彭玕帥衆數千奔楚淮南以左先鋒指揮使張景

思知信州遣行營都虞候骨言將兵五千送之危仔倡聞兵至奔吳越八月虔州刺史盧光稠以州附於淮南於是江西之地盡入楊氏光稠亦遣使附梁

七年

庚午晉岐吳稱唐天祐梁開平四年

春二月岐王承制加楊隆演嗣吳王

同上

十國春秋云萬全感自岐歸岐王承制加王兼中書令嗣吳王六月水軍指揮使教駢圍彭城玕弟於赤石楚兵救城鹵駢去冬十二月虔州刺史盧光稠有疾以位傳譚全播全播不受光稠卒其子延昌來奔喪全播立而事之王遣使拜延昌虔州刺史延昌受之復因楚通梁曰我受淮南官以緩其謀耳終當為朝廷經略江西梁以延昌為鎮南留後是冬淮南節度判官嚴可求請置制置使於新淦縣

遣兵戍之以圖虔州每更番輒潛益其兵虔人不覺也

八年

辛未晉岐吳稱唐天祐梁乾化元年

冬十二月百勝軍指揮使黎球

五代史作

求殺盧延昌而代之梁以球為虔州防禦使球卒牙將李

彥圖代知州事

十國春秋

五代史譚全播傳云乾化元年拜求防禦使求暴病死其

將李彥圖自立全播益懼遂稱疾焉杜門自絕彥圖死州

人相率詣全播第叩門請之全播乃起遣使請命於梁拜

防禦使

豫章書云吳淮南節度副使陳璋等進攻荆南高季昌遣

其將倪可福拒之吳恐楚人救荆南遣撫州刺史劉信帥

江撫袁吉信五州兵屯吉州為璋聲援

十一年

甲戌晉岐吳稱唐天祐梁乾化四年

夏四月吳袁州刺史劉崇景叛附

於楚楚將許貞帥萬人援之五月吳都指揮使柴再用米

志誠與劉崇景許貞戰於萬勝岡大破之

豫章書

劉威傳云子崇景官袁州刺史叛附於楚為柴再用所破

棄袁州遁去

十四年

丁丑晉岐吳稱唐天祐梁貞明三年

春三月楚馬存寇上高

十國春秋

十五年

戊寅晉岐吳稱唐天祐梁貞明四年

冬十一月吳取虔州

通鑑綱目

十國春秋云正月以右都押牙王祺為行營都指揮使將

洪撫袁吉之兵擊譚全播於虔州嚴可求以厚利募贛石

水工吳兵奄至城下虔人始知之

熟於水道故舟行無礙

七月軍中

大疫王祺病以鎮南節度使劉信為虔州行營招討使全

播乞師鄰境吳越閩楚皆出師救之楚將張可求將萬人

屯古亭閩兵屯雩都吳越錢傳球帥兵二萬圍信州信州

兵才數百逆戰不利刺史周本開門宴飲飛矢雨集安坐
不動吳越疑有伏兵解圍去八月劉信遣其將張宣夜襲
楚兵與張可求戰於古亭大破之又遣梁詮等擊吳越及
閩兵二國聞楚兵敗引去九月信攻虔州不克取質而還
徐溫怒益兵使更攻之十一月信還擊虔州先鋒始至虔
兵皆潰遂拔虔州追執全播於雩都以全播為右威衛將
軍領百勝軍節度使

十六年

已卯晉岐稱唐天祐梁貞明五年吳武義元年

夏四月吳王隆演建國改元

冬十二月吳團結民兵

通鑑綱目

十國春秋云以徐知誥為左僕射參政事兼知內外諸軍
事仍領江州團練使五月荆南為楚人所攻乞援遣鎮南
節度使劉信等率洪吉撫信步兵自瀏陽趣潭州使李簡

等統水軍攻楚

十八年

辛巳晉岐稱唐天祐梁龍德元年吳楊溥順義元年

冬十月加徐知誥同平章

事領江州觀察使尋以江州為奉化軍以知誥領節度使

後唐明宗天成二年

丁亥吳乾貞元年

冬十一月吳王楊溥稱帝

通鑑綱目

長興四年

癸巳吳太和五年

冬十一月吳信州刺史蔣延徽引兵攻

建州

同上

十國春秋云秋七月閩建州土豪吳光帥眾來奔且請兵
冬十一月信州刺史蔣延徽擅引兵會吳光攻建州

按豫章書誤載乾貞五年據五代史十國春秋吳楊溥
乾貞二年後即改元太和無乾貞五年也

後晉高祖天福二年

丁酉南唐昇元元年

秋七月吳徐誥稱帝國號唐

奉吳主為讓皇 同上

七年 壬寅南唐 夏五月唐以宋齊丘為鎮南節度使 同上

八年 癸卯南唐 冬十月張遇賢侵唐境唐遣兵擒斬之 同上

馬令南唐書云妖賊張遇賢 循州盜 聚眾十餘萬陷虔州諸

縣虔州城守遇賢據白雲洞命洪州營屯都虞候嚴思禮

一作嚴恩 通事舍人邊鎬討賊擒遇賢及賊副黃伯雄謀主僧

曹景全斬於建康市

陸游南唐書云虔有書生白昌裕沉密有謀邊鎬引與定

計刊木開道襲白雲洞會遇賢所事神棄去不復降語賊

眾遂潰其裨將李台執之以降

齊王開運元年 甲辰南唐 冬十二月唐以查文徽為江西安

撫使 豫章書

十國春秋云樞密使查文徽請伐殷詔以文徽為江西安

撫使俾覘建州文徽固請濟師乃以邊鎬為行營招討諸

軍都虞候共攻殷敗績於蓋竹明年七月邊鎬拔潭州八

月執其主王延政歸

三年 丙午南唐 秋八月陳覺擅發撫信州兵趨福州 十國春

秋

後漢隱帝乾祐三年 庚戌仍高祖號 冬十一月邊鎬統信州

屯兵以覘楚 南唐書

後周太祖廣順元年 辛亥南唐 秋九月命邊鎬出萍鄉以討

楚亂 十國春秋

南唐書云邊鎬以信州屯兵出宜春討長沙破其軍於龍

回關徐威等以希崇降希萼亦送款於鎬鎬盡遷馬氏之

族於金陵以希萼為洪州大都督

二年壬子南唐保大十年春正月以湖南行營糧料使王紹顏為筠州

分洪州高安縣置刺史南唐書

世宗顯德三年丙辰南唐保大十四年春三月唐遣將軍柴克宏再用子

將兵救常州敗吳越兵通鑑綱目

柴克宏傳云克宏為撫州刺史會淮南交兵吳越伺間侵

常州克宏請効死行陳元宗嘉其志授右衛將軍遣與袁

州刺史陸孟俊同救常州大破之

五年戊午南唐中興元年春三月唐以太弟晉王景遂為洪州大都督

夏五月唐主更名景去帝號奉周正朔同上

六年己未秋九月唐以洪州為南都

十國春秋云國主議徙都洪州曰建康與敵境隔江而已

今吾徙都豫章據上流而制根本上策也羣臣多不欲惟
樞密使唐鎬贊成之

宋

太祖建隆二年辛酉春二月唐徙都洪州綱目續編

十國春秋云國主遷於南都立吳王從嘉為太子留金陵

監國南都迫隘上下不能容羣心思歸國主鬱鬱不樂唐

鎬慚懼發瘍卒復議東遷未及行國主疾殂

乾德三年乙丑南唐後主煜三年秋九月召南都留守鄧王從益還都

以鄂州林仁肇為南都留守南昌尹南唐書

開寶五年壬申春二月江南主殺其南都留守林仁肇綱目續編

林仁肇傳云初仁肇密言於後主曰宋淮南諸州戍守單

弱連年出兵滅西蜀平荆朗今又取嶺表往返數千里師旅罷敝此在兵家為有可乘之勢請假臣兵數萬出壽春渡淝淮據正陽因其思舊之民累年之粟復取淮甸勢如轉丸臣起兵日仍馳聞北朝言臣據兵竊叛事成歸國否則請族臣以明陛下無二後主驚曰無妄言宗社斬矣仁肇素起家行伍雖任將帥與士卒均食同服故多得士心宋太祖忌仁肇名賂其侍者竊取仁肇像懸別室時楚國公從善質於汴引觀之曰仁肇行且降先持此為信耳又指空館曰將以此賜仁肇後主聞之不知其行間也潛使人醜仁肇陳喬歎曰事勢如此而殺忠臣吾不知死所矣

七年

甲戌秋九月遣曹彬將兵伐江南

宋通鑑

宋本紀云將行夜召彬入禁中語曰南方之事一以委卿

切勿暴略生民務廣威信使自歸順不須急擊

南唐書云袁州萍鄉制置使劉茂忠破潭師於境內拜茂忠袁州刺史

八年

乙亥

春二月江南遣使召神衛軍都虞候朱令贇以上江

兵入援冬十一月江南主煜降

綱目續編

南唐書云洪州節度使朱令贇將兵一十五萬屯潯陽湖口與諸將議曰若前進而北師反據我後則上江阻隔退乏糧道亟為鹵矣乃以書招南都留守劉克貞代鎮湖口克貞以病留令贇亦未進國主累促之令贇以長筏大艦帥水陸諸軍至虎蹲洲與王師遇舟筏俱焚令贇死餘眾皆潰

劉茂弘傳云金陵平後主入朝吉州刺史申屠令堅約茂

西江志 卷三十一
弘爲亂事未發而令堅卒茂忠遂降

宋史王明傳云明破江州軍獲船十餘艘敗湖口軍奪戰艦五百遇南唐將朱令贇將焚采石浮梁明帥所部舟師屯獨樹口密樹長木於洲浦間若帆檣狀令贇疑大軍襲其後逗撓不敢進明移檄諸軍相爲犄角至小孤山合勢大破之擒令贇卒大半皆赴水死金陵平詔明安撫諸郡擢知洪州

九年

丙子

春三月曹翰屠江州殺江南守將胡則

同上

胡則傳云爲江州指揮使金陵陷曹彬迫後主以手書命郡縣悉降書至江州刺史謝彥賓謀納欵則率宋德明等入攻彥賓執而殺之衆推爲刺史則嘗從劉仁贍爲壽州裨將盡得其城守方略於是日夜閱丁壯勒部伍爲堅壁

死守計命南面行營招安巡檢使曹翰攻之城帶江負山樓櫓高險不可破屢遣使諭降則誓死不從翰軍死傷者無算詔書切責督戰會則疾革城始陷翰將磔之俄死腰斬其屍以狗殺宋德明而墮其城七尺使後不可守翰屠城死者數萬人取屍投江流及井坎皆滿民間貨貨鉅萬翰掩而有之凡發大艦十餘艘悉載金帛置廬山鐵羅漢像於上號曰押綱羅漢

太宗太平興國四年

己卯

改建武軍爲建昌軍

豫章書

七年

壬午

以江州星子縣置南康軍

王存九域志

淳化元年

庚寅

冬十一月以虔州大庾縣置南安軍

同上

楊允恭傳云太宗命爲廣連都巡檢使時鹽自嶺入盜販者衆允恭請建大庾縣爲軍輦鹽官車以免其患詔建爲

南安軍有葉姓賊眾五百餘往來海上允恭集水軍掩襲斬之復奪還婦女六十餘口賊平詔書嘉獎賜錢十萬

三年壬辰以筠州之清江建臨江軍宋史地理志

允恭傳云命董江南水運兼捕寇盜行及臨江軍擇驍卒拏輕舟夜伺其出沒獲賊百餘悉梟其首

按大志楊允恭請建南安軍捕斬臨江賊誤載太平興國中今從宋史本傳

至道三年丁酉春正月分天下州軍為十五路綱目續編

顧祖禹方輿紀要云江南路領州十三饒州撫州江州洪州袁州吉州虔州信州筠州屬焉軍六南康軍臨江軍南安軍建昌軍屬焉

真宗大中祥符四年辛亥秋九月陞洪州長吏兼安撫使內出

綏撫十六條頒之宋史本紀

仁宗皇祐四年壬辰秋七月儂智高陷昭州以孫沔為湖南江

西安撫使綱目續編

孫沔傳云儂寇反沔入見言西事不煩聖慮當以嶺南為憂臣覩賊勢方張官軍朝夕當有敗明日果聞蔣偕死帝

諭執政誠如沔料龐籍奏為湖南江西安撫使兼廣南東西路以便宜行事請益發騎兵增選偏裨求武庫精甲憂

賊度嶺而北檄召湖南北大兵繕治營壘多具宴犒賊疑不敢進會遣狄青與沔會遂敗智高青平儂智高在五年正月

英宗治平元年甲辰以蔡挺提點江西刑獄兼提舉虔州鹽法時鹽寇千百為羣患苦州縣挺諭所部與期使自首納器

甲原其罪得兵械萬計盜賊從此衰息宋史列傳

徽宗宣和二年庚子夏四月江西添設提刑都監一員以西界

羣盜嘯聚也豫章書

饒州事考云宣和二年餘干楊彥興假佛聚眾知縣朱公彥具反狀會方臘亂彥興與其黨五百人奔附道遇捕臘兵盡殺之

欽宗靖康元年丙午冬十月安置李綱於建昌軍十一月南道

都總管張叔夜將兵勤王綱目續編

李綱傳云除河東北宣撫使時方議和詔止綱進兵未幾召赴闕除知揚州言者追論綱主戰喪師費財落職奉祠俄責授保靜軍節度副使建昌安置

張叔夜傳云時四道置帥令叔夜領南道都總管金兵再至詔趨入衛即自將中軍子伯奮將前軍仲熊將後軍合

三萬人轉戰而前十一月晦至都

高宗建炎元年丁未陞洪州為帥府宋史地理志

馮琦宋史記事云冬十二月盜張遇犯江州遇後為劉光世所破降於

淵王

三年己酉秋七月詔李邴滕康權知三省樞密院事奉隆祐太

后如洪州九月命劉光世移屯江州冬十月金人趨江西

光世引兵遁十一月隆祐太后如虔州江西州軍多陷綱目續編

綱目續編

孟后傳云太后至建康會防秋迫命劉寧止制置江浙衛往洪州百司非預軍事者悉從復慮敵人來侵命楊惟忠將兵萬人為衛密諭同行滕康劉珏緩急取太后旨便宜以行會劉光世屯江州不為備金果自大冶縣徑趨洪州

康珽奉太后行次吉州金人追急御舟夜行質明至太和縣舟人景信反惟忠兵潰失宮人百六十人康珽俱遁兵衛不滿百亟趨虔州時虔州府庫皆空衛軍所給皆沙錢市買不售與百姓交鬪縱火肆掠土豪陳新率眾圍城康珽等弗能禁惟忠步將胡友自外引兵破新於城下劉光世傳云隆祐太后在南昌命移屯江州爲屏蔽既至日置酒高會金人由黃州渡江三日無知之者太后退保虔州光世遁

豫章書云冬十月兀朮分兵一自滁和入江東一自蘄黃入江西劉光世及知江州韓杞遁十一月滕康劉珽聞金兵至奉太后出城江西制置使王子獻棄洪州遁金人陷臨江軍守臣吳將之遁陷洪袁撫守臣李積中王仲山王

仲巖降太后至吉州方五日金人追之急乘舟夜行至太和縣後自萬安陸行如虔州太后及潘貴妃以農夫肩輿而行金人陷吉州守臣楊淵遁叛軍護衛楊世雄犯永豐知縣趙訓之死之金人犯建昌軍兵馬監押蔡延世擊却之十二月金人屠洪州

四年庚戌春三月遣盧益辛企宗奉迎太后東還夏五月置沿江三路安撫大使朱勝非除江州路秋八月李成降詔江州撫納之九月命楊惟忠屯江州李成遣馬進犯江州命惟忠及王玠討之冬十月虔州賊李敦仁舉兵破石城縣十一月呂頤浩會惟忠與馬進戰不利遣巨師古救江州亦爲所敗詔王玠孔彥舟連援之十二月馬進分兵犯洪州李敦仁犯撫州圍建昌又犯汀州頤浩遣統置閻臯通

判蔡延世襲擊擒其弟世雄世臣

宋史本紀

呂頤浩傳云除江東安撫大使兼知池州駐軍鄱陽值馬進圍江州遣巨師古赴援失利奔洪州上以頤浩奮不顧身為人所難但失於輕進詔王夔以萬人速往策應頤浩復軍左蠡得崔增眾萬餘勢復振

王德傳云劉光世屯九江以便宜復德為前軍統制饒州賊劉文舜圍城德引兵誅之自餘請降不戮一人貴溪妖賊王宗石以念經為名時在信州德倍道鼓行擒獻於朝饒州事考云四月賊張頂花陷浮梁攝令郭俱死之

贛州謝志云虔州賊李敦仁舉兵破石城縣邑人陳皓及子敏力戰斬李世昌生擒李世立收復石城

紹興元年

辛亥

春正月命張俊為江淮路招討使岳飛副之江

州陷守臣姚舜明棄城走端明殿學士王易簡等二百人

皆遇害呂頤浩遣王夔崔增擊李成於湖口大敗之及惟

忠引兵趨江州二月曹成黨馬友犯筠州守臣王庭秀棄

城犯臨江軍守臣康倬遁三月張俊趨豫章與楊沂中岳

飛大敗馬進復筠州成聞進敗自引兵來遇於樓子莊又

大破之成勢迫絕江而去遂復江州詔奪成官募人擒斬

赦其脇從進復寇江州沂中趙密引兵追擊又大敗之成

奔蘄州夏六月南安賊吳忠作亂秋七月後軍將胡江等

叛破玉山弋陽永豐三縣遣樞密院準備將領徐文討之

張琪犯饒州閻臯擊敗之降其黨姚興

琪為王林所擒

冬十月范

汝為復叛入建州追辛企宗三官以孟庾為福建江西荆

湖宣撫使副以韓世忠討之十一月曹成犯安仁執安撫

向子諲

同上

張俊傳云改江淮以南招討使請討巨盜孔彥舟張用李成時成圍江州其黨馬進在筠州豫章介江筠之間俊聞命亟趨入豫章喜曰我已得洪州破賊必矣斂兵城中息金鼓禁人登城賊以為怯居月餘遣人索戰大書來牒俊細書報之尋謀知賊怠徑由上流絕生米渡出賊不意追奔七十里至筠州賊背河而陣率步兵當其前以精騎授楊沂中陳思恭約於午時從山後夾擊鏖戰及期精騎自山馳下賊駭亂退走遂復筠州追至奉新北樓子莊成黨商元據草山挾險設伏俊遣步兵從間道直趨山椒殺伏奪險乘勝追至江州賊勢危迫絕江而遁呼為張鐵山江州已復引兵渡江追殺馬進成北走降劉豫

岳飛傳云李成將馬進犯洪州連營西山飛請於張俊曰賊貪而不慮後若以輕兵絕生米渡出不意破之必矣俊大喜因以為前鋒飛重鎧躍馬潛出賊右突其陣所部從之進大敗走筠州飛抵城東賊布陣十五里飛先設伏以待選騎二百以紅羅為幟上刺岳字騎隨幟而前賊易其少薄之伏發敗走使人大呼曰不從賊者坐吾不汝殺坐而降者八萬進與餘卒奔南康飛夜引兵至朱家山斬其將趙萬成聞自引兵十餘萬來遇於樓子莊復大破之追斬進時張用方寇江西飛以書招之曰吾汝同里南薰門鐵路步之戰皆汝所悉欲戰則出不戰則降用得書遂降江淮悉平俊奏飛功第一加神武右軍副統制留洪州彈壓盜賊建寇范汝為將攻撫州飛遣人植岳字旗於城門

賊畏不敢犯已而賊黨逼建昌飛遣將討擒之

楊沂中傳云紹興十一年賜名存中破馬進於玉隆觀追至筠州成

自將十萬眾來援夾河而營沂中說俊曰彼眾我寡當出

奇破之願以騎見屬公引步兵居前俊從之即夜銜枚渡

筠河出西山馳下擊賊俊步兵夾攻俘八千人方戰未休

諸將慮降卒有變沂中曰殺降吾不忍諸將轉告俊竟坑

之

江西大志云賊帥張琪自徽犯饒州有眾五萬呂頤浩自

左蠡班師命其將閻臯姚端崔邦弼列陣以待琪犯臯軍

臯力戰端邦弼兩軍夾擊大破之

豫章書云六月南安賊吳忠宋破壇劉洞天作亂江西提

刑司遣官討賊破壇洞天伏誅忠遁七月虔州賊陳顥作

亂九月詔江西路安撫使復治洪州楊惟忠知江州兼安

撫使十一月范汝為犯光澤縣李山走信州十二月遣江

東安撫司統制顏孝恭討建昌軍賊

金谿兵氛志云七月賊潘奎等寇金谿鄧傳二社兵追殺

之於上幕鎮

二年壬子春正月楊惟忠誘誅楊勅夏六月詔孟庾還岳飛駐

江州召呂頤浩入朝以孟庾同都督江淮荆浙諸軍事冬

十月置饒州馬監知建昌軍朱芾擒斬石陂賊余照顏孝

恭復招降餘黨李寶等十二月虔州賊謝達犯惠州陳顥

陷汀州圍潮州不下引兵趨江西宋史弘簡錄

岳飛傳云二年曹成擁眾由江西歷湖湘據道賀二州命

飛權荆湖東路安撫都總管嶺表平授武安軍承宣使屯

江西志 卷三十一
江州安撫李回檄捕劇賊馬友郝通劉忠李通李宗亮張式皆平之

韓世忠傳云建州捷聞加賜黃金器皿因奏江西湖南寇尚多請乘勝討平之時曹成方擁眾郴邵世忠忽由處信徑至豫章連營數十里賊不虞其至大驚遣人招降之得戰士八萬遣詣行在

豫章書云三月李敦仁降及其徒皆授官四月陳顥焚龍川縣命江西安撫司討之江西賊趙進寇瑞昌縣楊惟忠討降之八月江西統制傅樞討南雄賊吳忠鄧慶劉軍一平之

三年癸丑春正月江西將李宗諒誘戍兵寇筠州遣統領趙進擊降斬之二月虔吉盜周十隆等連兵犯循梅汀州詔岳飛合

兵捕之夏五月知建昌軍朱芾討南豐縣賊誅其魁黃琛六月岳飛遣張憲王貴擒斬虔賊彭友餘悉降曲赦虔州命飛班師留兵三千屯駐虔廣彈壓盜賊八月詔飛赴行在留兵萬人戍江州九月以飛為江南西路制置使置司江州同上

岳飛傳云三年宣諭劉大中奏令飛討虔吉諸郡盜賊固石洞賊彭友悉眾迎戰躍馬馳突飛麾戈即馬上擒之餘酋退保其洞高峻環水止一徑可入飛列騎山下令皆持滿遣死士潛入賊巢黎明奮擊賊潰蔽山而下騎兵圍之賊號呼丐命飛令勿殺受其降初以隆祐太后震驚之故密旨令屠虔飛請宥不許請至三四帝乃曲赦虔虔人感其德繪像祠之萍鄉餘寇犯袁州授統領徐慶王貴方略

未幾悉平九月自江州來朝帝手書精忠岳飛字製旗以
賜改鎮南軍承宣使江南西路沿江制置使神武後軍都
統制偏將李山吳全吳錫李橫牛臯皆隸焉

四年

甲寅

秋七月建昌軍將修達等亂殺守臣劉湧江西制置

使胡世將遣叅謀侯慤統制丘贊共討之侯慤擊斬修達

八月周十隆降為官軍所掠復遁冬十月復以王瓊為江

西制置使

豫章書

五年

乙卯

冬十一月以李綱為江西安撫制置大使

綱目續編

宋本紀云是歲虔賊周十隆降復叛

李忠定奏議云虔賊周十隆等於正月內結集賊徒在虔
化等縣殺人放火本軍遷延寇賊滋蔓累經招安授官反
復作過理難容貸三月十四日奉旨除賊首周十隆不赦

外其餘徒眾許其自新仰李貴統率官軍前去措置招捕
其擒獲人依格推賞招到徒黨並時免罪將脇從并老弱
人放令歸業留強壯人隨軍務

贛州志云周十隆張大閑謝凱尹寶謝小鬼等攻破興國
雩都虔化瑞金等縣安撫使李綱遣州將何榮申討之復
興國縣追至贛縣界殺死賊眾五百餘人後統制官李貴
入寨招諭其黨悉就撫而十隆不從

六年

丙辰

夏四月命岳飛自九江進屯襄陽

宋史本紀

七年

丁巳

夏五月詔李綱趣捕虔吉諸盜責諸縣各募兵訓練

秋七月酈瓊叛降劉豫詔岳飛屯江州為淮浙聲援閏十

月李綱罷

同上

八年

戊午

秋八月遣御史李案宣諭江西措置盜賊

豫章書

九年未已春二月江西統制官李貴以其軍歸楊沂中宋史本

紀

十一年酉春正月兀朮由壽春府渡淮復陷廬州命岳飛屯

江州同上

豫章書云二月虔吉州盜悉平五月置江西總領軍馬錢

糧官十一月江西兵馬都監程師回討歐幻四等平之

二十年庚午夏四月信州妖賊黃曾等作亂陷貴溪縣江西兵

馬鈐轄李橫等討平之宋史弘簡錄

二十一年辛未秋七月虔州軍卒齊述殺統制吳進同總領馬

晟據州叛八月遣殿前遊奕軍統制李耕討之冬十一月

李耕入虔盡誅叛兵事遂平同上

大志云虔州軍亂遣鄂州都統田師中發兵同江西安撫

使張澄遊奕軍統制李耕左翼軍統制陳敏相繼討之就

命李耕知虔州後耕入虔州盡誅叛卒

贛州謝志云七月東南第六將校齊述以八營四千人據

州以叛脅附者又四千人高宗命神龍衛四廂都指揮使

忠州團練使李耕護殿陛之師致討尋命守虔耕至軍於

獅子岡劉綱以洪州兵駐城之東南張寧以循州兵駐城

之南張訓通以鄂州兵駐於北陳敏以福建兵駐於東鄧

酢以寧都兵扼水東王曆陳修年以漕屬給餉十一月耕

促雲梯天橋徑薄東北隅神臂弓交發命中礮十三梢飛

石相屬敢死士先登賊棄城巷戰耕督麾下躍之賊敗縋

西城訓通綱扼其衝半溺於江餘轉走城突張寧寨士鏖

戰一賊不得縱耕築京觀列功狀以聞將士遷秩有差

二十三年癸酉春二月鬻虔州叛卒黃明等凡八人於都市改虔

州為贛州 豫章書

三十年庚辰夏五月初置江州都統制以步軍司都統制戚方

為之六月以江西米茶充江州軍費 同上

按宋本紀戚方領屯在是年九月非五月也

三十一年辛巳夏六月金人復寇以劉錡為江淮浙西制置使

節制遂路兵馬 宋史列傳

孝宗隆興元年癸未夏五月安置李顯忠筠州冬十月陞洪州

為隆興府 宋史本紀

豫章書云以符離之敗李顯忠責授果州團練副使筠州

安置而邵宏淵仍前建康都統制後朝廷知其故復顯忠

太尉奉祠

二年甲申夏五月責邵宏淵靖州團練副使放南安軍 同上

乾道二年丙戌春正月裁江州軍額一萬 同上

三年丁亥春正月復江州所罷屯兵 豫章書

四年戊子閏七月戚方坐交結內侍竄信州復徙潭州籍所盜

庫金以犒軍 宋史弘簡錄

四年戊子夏五月饒信饑民嘯聚遣官措置賑濟 同上

七年辛卯江西路旱賑之募民為兵 同上

淳熙二年乙未夏四月茶寇賴文政由湖北入湖南數敗官軍

命辛棄疾節制江州都統皇甫侗調兵捕之六月命賑江

西被寇州縣仍蠲租稅茶寇轉犯廣東治失律罪編管江

西總管賈和仲閏九月棄疾誘文政殺之茶寇平 同上

辛棄疾傳云提點江西刑獄平劇盜賴文政有功歷遷湖

北湖南運副疏陳比年以來李全賴文政陳子明李峒相繼竊發皆能一呼嘯聚千百殺掠吏民至煩大兵翦滅良由州以趣辦財賦為急吏之殘害民物者州不敢問縣以並緣科斂為急吏之剥下奉上者縣不暇問田野之民始酷於聚斂中苦於科率及其終也豪民兼并盜賊剽奪相因而起欲望陛下深思致盜之由講求弭盜之術申飭州縣以惠養元元為意有違法貪冒者使諸司各揚其職無徒按舉小吏以應故事

三年

丙申詔選江州水軍一千人

九江兵防志

十五年

戊申

夏六月以江西提刑朱熹為兵部郎官未上而罷

綱目續編

宋史本傳云除兵部郎官以足疾辭上封事言急務有六

其一論軍政云凡諸將求進必先培剋士卒以自結於權倖而後姓名達于貴將貴將以付之軍中使自什伍而上節次保明稱其材武然後具奏陛下但見等級推先案牘具備誠以為公薦豈知其論價輸錢為債帥哉彼有智勇材略之人孰肯抑心下氣于宦官宮妾之門而陛下所得以為將帥者皆庸夫走卒猶望其修明軍政激勸士卒以強國勢豈不誤哉

寧宗開禧二年

丙寅

夏四月江州統制許進復新息縣五月江

西都統王大節攻蔡州不克軍潰冬十二月謫郭倪果州

副團練竄南康軍

宋史本紀

豫章書云韓侂胄銳意用兵錢象祖執不可遂以懷姦避事罷之尋奪二官信州居住六月諸軍俱敗王大節除名

袁州安置奪皇甫斌五官南安軍安置

范應鈴傳云開禧中知吉州贛叛卒朱先賊殺主帥應鈴曰此非小變也密遣謀厚賞捕之

嘉定二年已巳冬十一月廣南黑風峒寇李元礪復作亂連破諸縣詔遣荆鄂江池四州軍討之十二月吉州南安軍盜起同上

三年庚午春二月以工部侍郎王居安知隆興府督捕峒寇夏

六月江州副統劉元鼎及池州副統許俊與李元礪戰皆

不利賊勢愈熾冬十二月湖南賊羅世傳縛元礪以降峒

寇悉平同上

大志云淳熙當作嘉定間王居安知隆興府李元礪陳廷佐倡

亂撤永新撤龍泉江西列城皆震居安督戰於黃山賊始

懼走

四年辛未春二月李元礪伏誅賞平峒寇功授羅世傳通直郎

尋復叛為其黨所殺閏月罪諸路帥臣監司守令格廢賑

卹之令及盜發不卽捕者同上

十二年已卯春二月遣殿前司八千兵防捍江西宋史弘簡錄

十四年辛巳春二月詔江西權殿前司職司馮榭援蘄黃榭不

果行豫章書

理宗紹定二年已丑秋九月石城張遇龍文勝反於平固連破

石城寧瑞興雩五縣安撫李壽明通判趙彥覃督兵討平

之贛州兵寇志

三年庚寅春二月詔復贛吉建昌凡蠻獠竊發經擾郡縣賦稅

一年宋史本紀

撫州景定志云紹定三年春汀寇入宜黃焚崇仁郡城大震帥閻遣遊奕軍來援兼檄鄧傳二社兵暨坊團義兵登陴設備賊遁閏二月復犯金谿南境鄧傳兵馳歸逐之王師踵至賊遂平

劉壘汀寇紀略云己丑歲十月廖十六廖雲廖雷輩由廣昌來犯南豐西門知縣王日宣備禦無策賊陷城留一夕而去調江州兵百屯安禪寺戍守十二月調馮將屯西門翼日賊猝至馮被殺長驅入郭火官府民廬幾盡乃去攻建昌明年日宣以失守被劾選南城楊尉應廉來莅邑朝命御前諸軍副都統制夏訓武友諒將池司步騎至又命蔡將某率荆湖步騎至張總管率步兵至進屯廣昌賊遁松梓山池司兵攻破之時又起復陳工部鞞知南劍州兼

福建提刑江西招捕之職掎角平寇陳有威名多方略招致廖寇俱隸麾下亂遂以平

六年^{癸巳}陳鞞進寶章閣待制知隆興府贛寇陳三槍據松梓山砦出江廣所至殘虐遣官吏諭降輒殺之鞞乃決計除蕩十一月詔節制江西廣東福建三路捕寇軍馬^{宋史本傳}

端平元年^{甲午}春正月陳鞞進華文閣待制江西安撫使兼知贛州至則斬將士之張皇賊勢及掠子女貨財者齊敏李大聲所至克捷分兵守大石堡斷賊糧道遂破松梓山親督諸將乘春瘴未生薄山下賊悉精銳迎敵鞞軍步騎夾擊縱火焚其巢賊首張魔王自焚斬千五百級擒賊將十二得所掠婦女牛馬及僭偽服物各數百三槍中箭而遁

追及下黃又敗之遁至興寧就擒斬隆興市所跨三路數州六十砦悉平之同上

二年未秋七月知棗陽劉子澄棄城遁削秩貶瑞州宋史本紀

豫章書云十二月魏了翁開府江州了翁在朝凡六月前後二十餘疏皆當世急務帝將引以共政忌者合謀排擯之且言了翁知兵乃命出視師賜便宜詔書如張浚故事了翁以吳潛為參謀官趙善湘馬光祖為參議官

三年丙春二月復召了翁赴闕以陳韡為沿江制置使冬十月口溫不花入淮西詔陳韡應援同上

嘉熙二年戊春二月以史嵩之參知政事督視京湖江西軍馬三月高定子為中書舍人參贊京湖江西軍事豫章書

三年己夏四月吳潤權工部尚書沿江制置副使知江州秋

七月董槐知江州兼都督行府參議官同上

大志云嘉熙間江西峒丁反吉州萬安宰黃炳鳩兵守備一日五更報寇至炳亟遣卒迎敵眾曰空腹奈何炳曰第行飯即至率吏輩攜食桶沿市呼曰知縣買飯民罄釜與之士卒皆飽一戰破寇

淳祐二年壬進董槐直龍圖閣沿江制置使知江州主管江西安撫司公事蒐討軍實常若敵至裨將盧淵凶猾不受命槐斬之一軍肅然宋史本傳

五年乙夏五月從趙葵請詔江西造輕捷戰船置遊擊軍分備捍禦宋史本紀

十二年壬夏五月盜起玉山縣罷諸郡經界六月癸亥平之

同上

寶祐六年

戊午

賊張半天何白耆等率百眾寇南豐吏余璋急

斷浮橋賊憩水東官民俱逃逮昏賊始渡焚燒民廬市肆

明日乃歸巢

在木瓜山石半峒

諸司調撫贛旗馬軍合寨尉卒進

討擒其魁渠赴建昌凌遲梟令

汀寇紀略

開慶元年

己未

秋八月蒙古自黃州渡江侵臨江軍知軍陳元

桂死之九月詔賈似道兼節制江西二廣人馬通融應接

冬十月移馬光祖江州副使

宋史本紀

趙葵傳云開慶元年改隆興饒江徽州防拓調遣兼判建

康元將兀良哈解破湖南傳檄數宋背盟之罪理宗大懼

冬十月改江東西宣撫加益國公節制調遣饒信袁臨撫

吉隆興官軍民兵以禦之兼訪問百姓疾苦罷行黜陟並

許便宜從事給以緡錢銀絹措用

豫章書云八月蒙古兵至臨江時制置使徐敏子在隆興

頓兵不進知軍事陳元桂力疾登城督戰不能敵有欲抱

而走者元桂曰死不可去左右俱遁兵至元桂瞠目叱罵

遂遇害懸其首於敵樓蒙古入瑞州知州陳昌世素有善

政百姓擁之以逃十一月蒙古兵在潭江西大震左丞相

吳潛用御史饒應子言移賈似道于黃州黃雖下流實當

兵衝孫虎臣以精騎七百送之至蘋草坪候騎言前有北

兵似道大懼虎臣請出戰似道嘆曰死矣惜不光明俊偉

爾及北兵至乃老弱部掠金帛子女而還者江西降將儲

再興騎牛先之虎臣擒再興似道遂入黃州

景定元年

庚申

冬十二月印應雷直徽猷閣知江州主管江西

安撫司公事節制蘄黃興國三郡是歲蜀江西被兵州郡
兩稅同上

豫章書云秋七月吳潛奪觀文殿大學士罷祠削二秩謫
居建昌軍

二年辛酉秋八月謝枋得募民兵守信州冬十二月竄蒲擇之
於南康軍豫章書

謝枋得傳云趙葵給錢萬緡使募兵因說鄧傅二李諸大
家得丁力萬餘守信州

續綱目云賈似道忌功欲污鱣一時間臣遣官會計邊費
於是趙葵史巖之等皆坐侵盜掩匿罷官徵償及會計者
至信枋得曰不可以累宣撫自償萬緡餘不能辦乃上書
似道有云千金而募徒木將取信于市人二卵而棄干城

豈可聞於鄰國遂得免徵餘者

三年壬戌春三月汪立信差知江州主管江西安撫司公事秋

七月江州都統聶世興調遣入蜀託疾憚行詔奪二秩押
往京湖制司自效宋史本紀

度宗咸淳四年戊辰秋八月賊羅動天詹花五等以百餘眾破

南豐駐半日焚治寺民居市肆殺掠而去諸司調兵討平
之誅其渠魁汀寇紀略

六年庚午春三月立贛吉南安要衝四砦宋史本紀

豫章書云吉贛南安數被寇寇出沒無時砦卒莫能相援
因即要害立四砦每砦屯兵百地勢聯絡禦寇為便擇三
郡將官領之

十年甲戌七月度宗崩太子焜即位冬十一月命趙潛巡江策應賜錢百萬

激賞戰功十二月呂師夔請于江州募兵詔知州錢真孫同募豫給以尚書省錢米命賈似道都督諸路軍馬呂師夔黃萬石李珣參贊軍務孫虎臣總統諸軍同上

帝熈德祐元年

乙亥元至元十二年

春正月呂師夔錢真孫遣人於蘄

州請降元兵徇江州知壽昌軍胡夢麟寓治自殺知南康軍葉闓詣降二月轉黃萬石江西路制置使壬戌元兵徇饒州通判萬道同以城降知隆興吳益棄城遁甲子至臨江知軍鮑廉死之乙丑詔張世傑將兵入衛便道復取饒州其將謝元王海李旺袁恩呂再興戰死各贈十官丙寅文天祥起兵勤王三月趣呂文福入衛行至饒州殺使者入江州降夏四月總統張敏戰死豐城贈五官錄其一子五月貶潛說友南安軍贈鮑廉直文華閣官一子六月江

西制置黃萬石移治撫州詔還隆興府冬十一月壬午元兵至隆興府萬石奔撫州運判劉槃通判施至道以城降甲午萬石提兵走建昌軍同上

文天祥傳云知贛州兼江西安撫使德祐元年詔天下勤王天祥捧詔大慟使方興召吉州兵諸豪傑皆響應有衆萬人將入衛其友止之曰今元兵三道鼓行破畿甸薄內地君以區區烏合赴之何異驅羊搏虎乎天祥曰吾亦知其然顧不自量力欲以身徇庶天下忠臣義士有聞風而起者耳天祥上疏乞分天下爲四鎮建都督統御於其中以廣西益湖南建閩長沙以廣東益江西建閩隆興以福建益江東建閩番陽以淮西益淮東建閩揚州責長沙取鄂責隆興取蘄黃責番陽取江東責揚州取兩淮使其地

大力衆足以抗敵約日齊奮有進無退日夜圖之彼備多力分疲于奔命而吾民之豪傑者又伺間出于其中如此則敵不難破也不報

謝枋得傳云元年起爲江西招諭使以兵逆呂師夔呂軍馳至射之矢及馬前枋得走入安仁調淮士張孝忠逆戰團湖坪方坐敵樓見孝忠馬奔歸大驚果中流矢死師夔下安仁信州不守枋得棄妻子入建寧唐石山

信州之敗綱目在二

陳奎傳云謝枋得起兵安仁首辟奎入幕執安仁令李景景請以家貲二萬贖罪責曰普天之下莫非王土爾家財獨非朝廷物耶斬之景子率鄉兵五千報怨奎度勢不敵引兵趨信州攝郡事後兵敗入積煙山中自刎死

唐震傳云恭帝立起知饒州饒兵止千八百元軍略地震發民城守昧爽出治兵中夜不寐兵使來索欸狀通判萬道同偕寓士謀陰斂白金牛酒備降禮震叱去之民李希聖謀出降械寘於獄城中感其義共殺使者明年德祐二月兵大至都大提舉鄧益遁震出府庫金錢揭於市募人出戰衆懼無能應者北兵登陴遂潰震不屈與兄椿及家人俱死

密祐傳云大兵至隆興黃萬石移治撫州將遁懼祐不從乃召祐援槃未至聞槃已降罵曰萬石賣國小人使我志不得伸已而元帥張榮實呂師夔提兵逼撫州祐率衆進至龍馬坪大兵圍之數重矢下如雨祐告其部下曰今日乃我死日若力戰或有生理衆咸奮自晨至晷面中矢拔

之復戰身被四矢三槍麾下僅餘數十人祐揮雙刀斫圍南走馬渡橋斷被執終不屈而死時有淮人米立三世爲將萬石署爲殿前都統制迎戰於江被執不屈繫獄萬石既降再三諭之不從遂遇害

汀寇紀略云乙亥十二月江西諸郡受兵大勢震擾尉寨兇卒乘時略邑賊首陳捷江七龍輩起中和保擁衆劫村落時南北未一有司招安之假以虛名使散其衆明年陳江降於制置使吳浚

二年

丙子元至元十三年

春正月甲戌元兵至瑞州知州姚巖棄城走

辛巳授留夢炎江湖兩地宣撫大使甲申遣御史楊應奎上傳國璽奉表稱臣削去帝號悉獻兩浙福建江東西湖南二廣兩淮四川見存州郡

宋史弘簡錄

宋史紀事云正月進封吉王昞爲益王判福州信王昺爲

廣王判泉州五月益王即位於福州改元景炎詔以趙潛

爲江西制置使進兵邵武謝枋得爲江東制置使進兵饒

州

時枋得敗已不能軍

吳浚爲江西招諭使鄒淵副之毛統由海道

至淮約兵會合六月吳浚聚兵廣昌遂復南豐宜黃寧都

三縣傅卓至衢信諸縣民多應之者會浚兵敗卓詣元軍

降七月文天祥開府南劍州經略江西八月張世傑遣都

統張文虎與吳浚合兵十萬期必復建昌與李恒戰敗奔

寧都九月元軍分道窺閩廣塏出及呂師夔李恒等以騎

兵出江西十月天祥帥師次汀州遣趙時賞等將一軍趨

贛以取寧都吳浚將一軍取零都劉洙等皆自江西起兵

來會元呂師夔將兵度梅嶺曾逢龍敗死十一月遣倪宙

奉表請降于元

豫章書云正月知臨江軍滕巖瞻遁清江令孟濟死之二月瑞州安撫姚文龍及其帥張文顯降於元元隲吉撫城存隆興以汀州兵戍瑞金縣

浮梁兵燹志云正月元兵次饒州秋方登降范相棄城復走

端宗景炎二年

丁丑元至元十四年

春正月吳浚棄瑞金遁鎮撫孔遵

入之浚尋還汀州降三月天祥取興國縣夏五月天祥自梅州提兵出江西入會昌縣六月辛酉天祥取雩都已卯入興國縣秋七月遣兵取吉贛諸縣圍贛州撫州人何時起兵來應江西宣慰李恒遣兵援贛州而自將兵入興國八月天祥與諸將兵皆敗乃引兵即鄒鳳於永豐鳳兵亦

潰天祥至空坑挺身走循州諸將皆被執九月元左丞塏出將兵入大庾嶺

同上

宋史紀事云二月吳浚既降元因至漳州說天祥降天祥責以大義斬之五月天祥復會昌縣六月天祥敗元軍于雩都七月使趙時賞等分道復吉贛諸縣遂圍贛州八月李恒遣兵援贛自將攻天祥于興國天祥不意恒等猝至遣兵戰鍾步不利時鄒鳳聚兵數萬于永豐引兵就之會鳳兵先潰恒追天祥至方石嶺及之鞏信以短兵接戰恒駭其以寡敵衆疑有伏斂兵不進信坐巨石餘卒侍左右箭雨集屹不動恒從間道視之創被體而死不仆天祥至空坑兵盡潰趙時賞坐肩輿後元軍問爲誰時賞曰我姓文衆以爲天祥擒之由是天祥得與杜滸鄒鳳乘騎逸去

九月元將增出等以步卒入大庾嶺合舟師追二王
撫州兵氛志云崇仁民羅辛二聚眾數百長驅入縣監邑
忻都遁殺羅尹焚縣治文廟去監邑孫廷玉導帥府兵屠
之

帝昺元年

戊寅五月衛王改元
祥興元至正十五年

冬十二月文天祥走海豐張

洪範執之元兵破南安守將李梓發死之

同上

西江志卷第三十

西江志卷第三十一

武事三

元

世祖至元十六年

己卯二月宋
主昺赴海死

春二月勅贛州造戰船以征

日本夏四月以江州隸黃蘄路宣慰司

豫章書

元史張弘略傳云十六年遷江西宣慰使會饒州盜起犯

都昌弘略以為饒雖屬江東

時屬江東
建康道

與南康止隔一湖

此寇不滅則吾境必有相煽而起者乃使人直擣巢穴生
縛賊酋磔於市餘黨潰散下令曰不操兵者皆為平民餘
無所問

十七年

庚辰

夏四月南康杜可用叛命史弼討擒之秋七月徙

泉州行省於隆興

元史本紀

元史邱順傳云十七年陞鎮國上將軍都元帥鎮龍興諸路兼管本萬戶府事賜銀印吉顛盜起行省遷元帥府以鎮之

按二十一年始改隆興為龍興傳內字訛

十八年辛巳春二月以江西道宣慰使兼詔討使也的迷失叅知政事行中書省事閏八月江西行省薦舉兵官命罷之同上

十九年壬午春三月併江西福建行省冬十一月以袁州饒州復隸隆興省十二月以中山薛保住上匿名書告變殺宋

丞相文天祥同上

二十年癸未春正月令隆興行省遣軍護送占城糧船時征占城夏六月以征日本民間騷動盜賊竊發忽都帖木兒忙古帶

乞益兵禦寇詔以江州軍付之同上

脫落合察兒傳云二十年江西行省命討武寧叛賊董琦平之改授虎符江州萬戶府達魯花赤

二十一年甲申春正月立江西行樞密院治撫州二月以江西叛寇妻子賜鷹坊養虎者瑞州獲叛民晏順等三十二人并妻子送京師征占城船不足命江西省益之三月置贛吉撫建昌戍兵夏五月樞密院臣言峻都潰軍已令李恒收集江西潰軍別遣使招諭凡至者皆給糧舟楫損者修之以俟阿里海牙調用冬十一月江西行省叅政也一作月

的迷失獲海盜黎德及招降餘黨百三十三人即其地誅黎德以德弟黎浩及偽招討吳興等檻送京師同上

二十二年乙酉春正月盧世榮請罷福建行中書省立宣慰司

西江志 卷三十一
隸江西二月改江西招討司為上中下三萬戶府江西盜
黎德等餘黨悉平秋九月以江淮行樞密院所總蒙古兵
戍江西同上

地理志云二十二年江州復隸江西行省

續綱目云正月盧世榮奏罷江南行御史臺未幾帝以為
疑安童曰江南盜賊屢起行臺鎮遏之功居多不可罷但
與行省並治杭州差覺僻遠宜徙江州據三省之間從之

二十三年丙戌春二月命江西行省兵伐交趾冬十月以南康
路舊隸江隸江西行省同上

齊秉節傳云初授明威將軍二十三年移鎮饒州安仁劇
賊蔡福一叛秉節與有司會兵討之擒福一餘黨悉平

二十四年丁亥春正月詔發江西蒙古漢兵征交趾冬十月江

西行院月的迷失言廣東窮邊險遠江西福建諸寇出沒
之所令江南諸省分軍一萬益臣詔江西忽都帖木兒以
軍五千付之十一月以江西平章忽都帖木兒捕廣東寇

豫章書

管如德傳云二十四年贛汀盜起如德指揮討平之脇從
者多所全宥

二十五年戊子春三月廣東賊董賢舉等七人皆稱大老聚眾
反剽掠瑞撫龍興南安韶雄汀諸郡連歲擊之不能勝行
樞密副使月的迷失請益兵江西行省忽都帖木兒亦以
地廣兵寡為言詔江淮省分兵詣江西秋七月以連歲盜
起免南安瑞贛三路逋稅月的迷失上言盜起廣東分江
西江淮福建三省兵萬人令臣將之討賊臣願萬人內得

蒙古軍三百并臣所籍降戶萬人置萬戶府以撒木合兒
爲達路花赤佩虎符詔許之 同上

二十六年^丑春正月以左丞唐兀帶副按的忽都合爲蒙古
都萬戶統兵會江淮福建二省及月的迷失兵討盜於江
西鍾明亮寇贛州掠寧都據秀嶺詔發江淮省及鄰郡戍
兵五千遷江西省叅政管如德爲左丞將兵往討夏五月
明亮率衆來降江淮福建江西三省所抽軍各還本翼秋
七月誅信州叛賊鮑惠日等三十三人閏十月鍾明亮復
反江羅等應之聲勢張甚詔月的迷失復與福建江西省
合兵討之且諭旨明亮旣降朕令遣赴闕而汝玩常不發
致有是變自今降賊其即遣之湖廣省臣言近招降贛州
胡海等令將其衆屯田自給今過耕時不恤之恐生變命

贛州路發米千八百九十石賑之

元史本紀

續綱目云夏四月福建叅知政事魏天祐執宋謝枋得至
燕不屈死之

陳邦瞻元史紀事云冬十月月的迷失以丘應祥董賢舉
歸京師鍾明亮復反

二十七年

庚寅

春二月江西諸郡盜未平詔江淮行省分兵一

千益之江西羣盜鍾明亮等復降詔徙爲首者至京餘黨
給糧江西賊華大老黃大老等掠樂昌諸郡行樞密院討
平之三月建昌賊丘元等稱大老集衆千餘人掠南豐建
昌副萬戶擒斬之以建昌路廣昌縣經鍾明亮之亂免其
田租九千四百四十七石夏五月江西行省管如德江西
行院月的迷失合兵討反寇鍾明亮明亮降詔縛致闕下

如德等留不進明亮復率眾寇贛州樞密院以如德等違
詔縱賊請詰之詔罷江西行樞密院移江西行省於吉州
以便捕盜以外刺帶爲左丞江西行省言吉贛湖南廣東
福建以禁弓矢賊益發乞依例許尉兵持弓矢從之六月
別給江西行省印以便分省討賊從江西省請發各省戍
兵討賊秋八月以南安贛建昌豐州罹明亮之亂悉免田
租同上

劉國傑傳云二十七年江西盜起龍泉下令往擊之諸將
交諫曰此他省盜也國傑曰縱寇生患患將難圖豈可以
彼此言耶乃選輕兵棄旗鼓去纓飾一日夜趨賊境賊眾
數千逆戰望見軍容不整曰此鄉丁也易之國傑以數十
騎陷陣眾從之賊大敗斬首五百餘級奪所掠男女日暮

忽收兵去堡中民望見恠之莫知其誰明日又忽至召堡
民歸其男子曰吾劉二霸都也盜鍾太獠居南安十八磊
國傑乘霧突入其巢賊眾驚亂自相蹂踐官軍搏之自旦
至午擒殺甚眾還兵桂東二月龍泉盜復寇鄱縣國傑至
賊退保大井山乘大雨盡掩殺之

劉堽平寇碑云至元戊子畚寇鍾明亮起臨汀有旨進討
輒僞降以欺我師明年丘元起廣昌與明亮犄角遂及南
豐勢張甚又明年春賊大至陣河田九陂又陣小菜遂犯
州州南門瞰江賊乘橋攻門城戍單弱乃斷橋以拒適雨
暴江漲賊引退焚戮村落無虛日叅政李世安率諸將擣
丘元之巢殲其渠丘元敗而明亮孤不數日賊悉平

二十八年辛卯春二月立江西行樞密院治汀州秋七月治贛

江西志 卷三十一 州同上

二十九年壬辰春正月江西行省左丞高興言江西連年盜起百姓入山以避乞降旨招諭復業同上

三十年癸巳春二月江西行院月的迷失請嚴庇匿盜賊之禁豫章書

三十一年甲午正月世祖崩冬十月罷江西行院并入行省同上

伯顏傳云江南三省累請罷行樞密院成宗問于伯顏時已屬疾張目對曰內而省院各置為宜外而軍民分隸不便成宗是之三院遂罷

成宗元貞元年乙未夏五月竄忙兀部別闊於江西俾從月的迷失討賊六月吉顛南安等處蠻寇竊發以軍民官備禦不嚴撫字不至皆責而降之元史本紀

二年丙申冬十月贛州盜起江西行省左丞董士選擊平之綱目續編

元史紀事云贛州民劉六十聚眾至萬餘建立名號朝廷遣將討之多觀望不進賊勢益盛左丞董士選請自往進至興國距其營百里命將校分兵守地悉置激亂之人於法復誅姦民為囊橐者於是民爭出自効不數日六十就擒餘黨悉散士選遣使奏聞但請黜賊吏數人略不及破賊事時稱其不伐

元明善傳云董士選陞江西左丞辟明善為省掾會贛州賊劉貴反明善從士選將兵討之擒賊三百人明善議緩誑誤得全活者百三十人將佐白宜多戮以張軍聲明善固爭以為王者之師恭行天罰小醜陸梁戮其渠魁可爾

民何辜焉既又得賊所書贛吉民丁十萬於籍請火之以滅跡二郡遂安

大德二年戊戌秋七月吉贛立屯田元史本紀

仁宗皇慶元年壬子春正月以吉州舊為分地改吉州路為吉安路豫章書

延祐二年乙卯秋七月贛州土賊蔡五九聚眾作亂敕遣兵捕之八月蔡五九陷汀州寧化縣僭稱王號詔遣江浙行省平章張驢等率兵討之臺臣言蔡五九之變皆由昵匪馬丁經理田糧與郡縣橫加酷暴逼抑至此新豐一縣撤民廬千九百區夷墓揚骨虛張頃畝流毒居民乞罷經理及冒括田租制曰可九月蔡五九眾潰伏誅餘黨悉平敕賞軍士討捕功并官死事者子孫元史本紀

贛州志云乙卯四月寧都賊蔡五九聚眾免子寮五王廟張漢高旗幟殺趙同知圍州城燒四關勢甚猖獗奏遣張驢會江浙兵討之五王廟者邑妖祠也像設極魔恠人莫敢側目土人類縛生口以祭我軍見之畏縮押錄王榮叔獨奮義火之三火三滅乃取婦人褻衣羃神首一火而燼遂平其城石城弓兵宋伏成於木麻坑擒五九伏誅

五年戊午秋七月流諸王也舍於江西以諸王不里牙敦之冬叛不助官軍進討也冬十月贛州路零都縣里胥劉景周以有司徵括田新租聚眾作亂敕免徵新租招諭之同上

六年己未春正月廣東南恩新州猺賊龍郎庚等為寇命江西行省發兵捕之同上

泰定帝泰定二年乙丑秋七月海北猺酋盤吉祥寇陽春縣命

江西行省督兵捕之九月分天下為十八道遣江東廉訪使朶列秀太史院使齊履謙之江西宣撫同上

文宗天曆二年己巳春三月調江西兵討四川囊加台豫章書

至順元年庚午夏四月詔江西調兵會討雲南祿余宣撫使秋七

月詔江西建昌萬戶府軍戍廣海者一歲更役來往勞苦

仍至元舊制二歲一更九月江西軍征雲南者人給鈔五

錠元史帝紀

二年辛未夏五月置臨江宣慰司兼管軍萬戶秋七月海南黎

賊作亂詔江西湖廣兩省合兵捕之同上

順帝元統二年甲戌秋九月徭賊陷賀州發江西軍從廣西宣

慰使帥章伯顏擊之同上

元至三年丁丑春正月廣州增城朱光卿反其黨石崑山鍾大

明率眾從之偽稱大金國改元赤符命指揮狗札里及江

西行省左丞沙的討之二月廣西徭賊復反命江西行省

平章秃兒迷失海牙總兵捕之夏四月惠州歸善聶秀卿

譚景山等造軍器拜戴甲為定光佛與朱光卿相結為亂

命左丞沙的收捕秋七月狗札里沙的擒朱光卿尋追擒

石崑山鍾大明九月立江西行樞密院同上

四年戊寅春二月罷行樞密院夏六月袁州民周子旺反僭稱

周王偽改年號尋擒獲伏誅漳州路李志甫反守將搠斯

監與戰失利詔江浙行省平章別不花總江西閩廣軍討

之同上

至正五年乙酉冬十月命前雲南行省右丞散散將作院使王

士弘巡江西一切興利除害之事悉聽舉行豫章書

六年丙戌秋八月命江西行省右丞禿魯合江浙軍討汀賊羅天麟閏十月賊徒羅德用殺羅天麟陳積萬以首級送官餘黨悉平元史本紀

七年丁亥冬十一月徭賊吳天保陷靖州命威順王寬徹不花鎮南王孛羅不花及江西湖廣二省以兵討之同上

八年戊子萬載妖人彭國玉以白蓮惑眾倡言撒豆成兵飛茅為劍謀不軌事敗竄入麻城合鄒普勝之眾數萬以紅巾為號袁州遺事志

十一年辛卯冬十一月江西妖人鄧南二作亂攻瑞州總管禹蘇福擒斬之元史本紀

大志云蘄黃紅巾蔓延新建土寇鄧南二由蘄黃鶴鄉乘勢聚眾往攻瑞州守禦官軍出城迎捕行省遣萬戶張當作

章安因領兵次烏山夾攻擒獲鄧南二誅之

十二年壬辰春二月徐壽輝蘄州人僭號天完兵陷江州總管李黼死

之遂陷南康路壽輝偽將歐祥陷袁州春三月偽將陶九

陷瑞州總管禹蘇福萬戶張岳敗之偽將項普略陷饒州

路遂陷信州以江浙行省左丞亦憐真班為江西行省左

丞領兵收捕饒信賊閏三月壽輝偽將陳普文陷吉安路

鄉民羅明遠起義兵復之以大都留守兀忽失為江浙行

省添設右丞討饒信賊命左丞亦憐真班以兵守江東西

關隘右丞火你赤與參知政事朵鐸討江西賊夏四月臨

川賊鄧忠陷建昌路江西宜黃賊塗佑與邵武建寧賊應

必達等攻陷邵武路總管吳按攤不花以兵討之千戶魏

淳計擒塗佑應必達五月建昌民戴良起鄉兵克復建昌

路冬十一月以星吉爲江西行省平章出師湖廣十二月以信州克復赦註誤者蠲其夏稅秋糧

同上

元史紀事云二月徐壽輝兵攻九江右丞孛羅帖木兒方駐兵于江聞風宵遁總管李黼檄鄉落聚木石于險處遏其歸路黃梅主簿也孫帖木兒願擊賊黼與出戰殺獲二萬餘人黼曰賊不利于陸必以舟薄我令以長木數千冒鐵錐於杪暗植沿岸水中賊舟數千艘順流鼓譟而至遇木椿不得動發火箭射之焚溺無算時東際淮甸西迄荆湖守臣往往棄城遁黼中外援絕賊進兵薄城分省平章禿堅不花自北門出走黼引兵登陴賊已焚西門張弩射之轉攻東門黼急往救城已破猶與巷戰力不能敵乃揮劍叱之曰殺我無殺百姓賊刺之墮馬與兄冕子秉昭俱

死事聞贈黼隴西公諡文忠三月賊陷饒州執魏中立陷信州執于大本二人不屈並死之十二月江西行省平章星吉馳赴任比至江東復有詔令守江州時江州已陷星吉募兵得三千人擒周驢奪船六百艘軍聲大振進復湖口縣克江州留兵守之命王惟恭柵小孤山吉自據番陽口綴江西要衝以圖恢復日久援不至賊乘大艦來攻編葦筏塞上下流火之星吉率兵力戰衆死且盡星吉猶堅坐不動中流矢而仆賊素聞其名不忍害昇至密室乃蘇羅拜餽食星吉叱之七日乃自力而起北向再拜曰臣力竭矣遂絕

道童傳云禿堅不花由江州遁還普賢不花將兵往江州至石頭渡遇賊戰敗道童聞之大恐即懷省印遁走普

顏不花還與章伯顏定守城之計後數日道童始自南昌
民家來歸遂議分門各守以備敵數月賊衆來圍城城中
置各廂官及各巷長晝夕堅守道童素恤民能任人有功
者必賞無功或不加罪故多爲之用賊圍城凡兩月民無
離志道童密召死士數千面塗以青額抹黃布衣黃衣爲
前鋒又別選精銳數千爲中軍而募助戰者殿後命萬戶
章安因卜魯哈歹領之夜半開門伏兵柵下黎明鉦鼓大
震因奮擊賊驚爲神敗走遂乘勝擣其營復分兵埽其餘
黨伯顏功最多尋以病卒

亦憐真班傳云十二年移江西行省左丞相妖寇由蘄黃
陷饒州饒之屬邑安仁與龍興接境其民皆爲亂亦憐真
班道出安仁因駐兵招之來者厚加賞賚不從者命子哈

藍朶兒只與右丞火你赤乘高縱火攻散之餘千久爲盜
區亦聞風順服

大志云十二年春蘄黃有稱鄒元帥者

即鄒普勝

由湖廣九江

率衆水路來攻龍興圍城五十四日時平章道童署左丞
章伯顏郎中普顏不花廉訪僉事鎖魯灘并力固守官軍
雖單弱幸民之敢勇者赴義死戰老弱亦登城運石行饑
適臨江楊萬戶率義兵來援省臣命駐撫州門與城中接
勢翼日楊以小舟自城南順流而下城中義兵亦自新城
門小渠中出龍沙泝流而上合戰無虛日屢獲其巨艦輜
重賊不能支夕遁去三月紅巾蕭鄭二百戶與新塘塘主
羅志名者立寨閩三月廿一日義士夏正卿譚則賢等率
義兵五千人擊之戰敗殺溺千餘人正卿死之蕭鄭亦遁

去又史普清者稱元帥率斬黃之衆數百自奉新抵新建
驅脇鄉民據新塘復立寨土寇喻謙可屈祥喻昇余玉等
佐之故家大族殘滅殆盡鄒旣敗走行省屢遣朱千戶領
兵討之不能克義士夏益卿熊天佐等不敢入惟駐生米
章家渡以爲郡城西障時阿都赤招集義兵屯大塘嶺遏
興國建昌往來之衝以故西岸之紅巾不得近城至秋鄒
復遣其黨自興國出武寧奉新豐城入南昌境欲攻城義
士黃季中劉仲昇等率義兵接戰勝之維時藩府雖鞏固
而四郊皆寇壘也

豫章書云至正壬辰紅巾賊再陷新昌義士張子忠罵賊
而死里人毛忠吾保逍遙山招郭克敬合兵援州治復之
撫州志云閏三月紅巾自臨江富州今豐城入撫州監郡完

者帖木兒元帥章士謙戰屢捷寇不能入

十三年

癸巳

夏五月江西左丞亦憐眞班江浙左丞老老取道

自信州元帥韓邦彥哈迷取道由徽州浮梁同復饒州斬
黃賊聞風皆奔潰秋八月資政院使脫火赤復江州冬十
一月江西右丞火你赤以兵平富州臨江遂復瑞州是月
立義兵千戶水軍千戶所於江西事平願爲民者聽同上
瑞州志云右丞火你赤進兵復瑞擒况普天閔總管彭國
玉併家屬無少長鬻之民應之者亦戮以徇

餘干災祥志云五月知州烏樞復州治七月吳宏復陷餘
干

十五年乙未春二月命刑部尚書董銓與江西行省平章火你
赤專征討冬十一月賊陷饒州路豫章書

吉安郡紀云十五年袁寇李明陷安福

十六年丙申江西廉訪使吳當調檢校章迪率本部兵與兵部

尚書黃昭夾攻撫州勦殺首寇胡志學進兵復崇仁宜黃

於是建撫兩郡悉定元史本傳

十八年戊戌夏四月陳友諒沔陽人本姓謝陷龍興路省臣道童火你

赤棄城遁友諒遣王奉國陷瑞州路五月庚戌友諒陷吉

安路辛酉陷撫州路秋八月友諒兵陷建昌路九月友諒

陷贛州路江西行省叅知政事全普菴撒里及總管哈海

赤死之元史本紀

道童傳云四月友諒復攻江西城時火你赤已陞平章政
事加營國公行便宜事任專兵柄素與道童不相能且貪
忍不得將士心見城且陷夜遁道童亦棄城退保撫州路

追者至道童欲迎敵渡水未登岸賊衆乘之遂為所害

全普菴撒里傳云江西下流諸郡皆為友諒所據乃與總
管哈海赤勦力同守友諒遣將幸文才率兵圍贛使人脅
之降普菴撒里斬之探甲拒戰凡四月兵少食盡義兵萬
戶馬合某沙欲舉城降遂自剄事聞贈諡曰傲哀哈海赤
亦不降見殺

郭鈺悲廬陵詩序云素兵逼城屯藤橋丁酉正月廬陵陳
瓘出屯城北之青湖二月吳都事命兵校明某下桐江計
事不報入蘭溪召不至五月桐江李彬誅六月素州兵退
秋明某歸以其屬屯太和之永和十一月明某矯殺騎將
林伯顏武端不問戊戌正月全參政兵亂逐鎮撫吳林三
月梁太守卒安成兵自去冬侵掠北境四月復至桐江五

月初四退初十戊申分宜袁雲飛導沔兵至桐江己酉義士劉照與戰於吉水之灘頭庚戌明某以都事之衆降辛亥傅于城錄事張元祚與攝監郡雅某降全叅政奔贛叅謀鄉貢進士吉水蕭彞翁死之陳瓘召安成兵入城六月吳都事將其屬居吉水之蘆兜此吉安再陷之略也

大志云陳友諒黨熊天瑞陷贛州遣指揮王璵據南安

十九年己亥夏六月天完將陳友諒攻信州元江東廉訪使伯顏不花的斤往救死之冬十二月天完將陳友諒徙其主

徐壽輝都江州自稱漢王

綱目續編

伯顏不花的斤傳云正月自衢引兵來援遇王奉國城東力戰破走之時鎮南王子大聖奴屯兵城中開門出迎伯顏不花的斤登城四顧誓以破賊自許後賊復來攻乃命

大都閭將阿速諸軍及民義爲左翼出南門高義范則忠將信陽一軍爲右翼出北門自與忽都不花將沿海諸軍爲中軍出西門因奮擊入賊營斬首數千級幾擒奉國適賊將突至其勢幾殆忽都不花勒兵力戰乃破之二月友諒弟友德于城東繞城植木柵攻益急又遣僞萬戶周伯嘉來說降高義潛與之通給忽都不花率則忠等十人往見奉國皆囚之明日令高義單騎來誘伯顏不花的斤曰我頭可斷足不可移乃數其罪斬之由是日夜與賊鏖戰糧竭矢盡氣不少衰軍民惟食草苗茶紙括靴底掘鼠羅雀及殺老弱以食五月大破賊兵六月奉國親來攻城晝夜不息者踰旬賊穴地百餘所或魚貫梯城而上麾兵拒之已而士卒力疲不能戰萬戶顧馬兒以城叛遂陷大聖

奴海魯參謀皆死之伯顏不花的斤力戰不勝遂自剄其部將蔡誠蔣廣巷戰誠遇害廣爲奉國所執罵賊磔于竿義兵陳受痛罵不屈賊焚殺之

撫州志云六月新淦寇鄧克明擒殺劉世英據崇仁樂安安仁人王溥據金谿友諒以克明爲右丞據撫州

元史紀事云初壽輝聞友諒破龍興欲徙都之友諒忌其來不利於己不從至是壽輝引兵南下江州友諒陽出迎伏兵城西旣入門閉伏發盡殺其部曲惟存壽輝以江州爲都居之遂自稱漢王立王府置官屬事權盡歸友諒壽輝惟擁虛位而已

明年五月弒壽輝自稱漢帝改元大義

二十年庚子夏六月明兵取信州路元史本紀

谷應泰明史紀事云六月胡大海率兵至靈溪城中步騎

數千出迎戰擊敗之督兵攻城衆潰遂克之改信州爲廣信府以大海子德濟爲同僉守之七月徐壽輝舊將浮梁院判于光左丞余椿擊走僞漢將辛同知取饒州以城來降命鄧愈往鎮之饒濱鄱陽湖友諒數遣舟師來攻愈與光連營拒之已而漢將侯邦佐陷浮梁于光單騎來歸九月壽輝舊將歐普祥以袁州來降友諒遣其弟友仁攻普祥擊敗之擒友仁友諒懼乃與普祥約和釋友仁歸南安事考云二十年龍泉寇彭時中僞號東周據上猶大志云時中遣其黨段九據上猶尋爲僞漢所戮

二十一年辛丑秋八月明兵取江州路時僞漢陳友諒據江州

爲都至是退都武昌九月取建昌饒州二路同上

明史紀事云三月友諒遣其將李明道寇廣信據草坪一作

草平 鎮 遏浙東援兵胡德濟遣夏德潤出兵奪其墩戰死賊
又保玉山胡大海部將繆美聞之來援與賊戰于東津橋
遂復玉山抵廣信絕明道歸路明道圍廣信急德濟兵少
嬰城守遣使求援于父大海大海率師由靈溪進李文忠
亦遣兵援之德濟聞援兵至引兵出城與大海夾擊明道
擒之及其宣慰王漢二大海送明道漢二於文忠建昌守
將王溥漢二兄也遂歸附俱送建康太祖釋而用之征江
州南昌用為鄉導八月劉基請棄安慶去經拔江州傾其
巢穴從之遂率兵西上長驅過小孤友諒將丁普郎傅友
德率所部歸附次湖口友諒舟出江偵邏擊敗之乘勝至
江州友諒以為神兵自天而下倉卒不能軍挈妻子夜奔
武昌師入江州偽漢江西行省丞相胡廷瑞後改名廷美守南

昌遣其部將鄭仁傑納款且請禁止數事勿散離其所部
兵太祖有難色劉基自後陽所坐胡牀太祖悟許之賜書
慰諭廷瑞得書遣康泰詣九江降漢將餘干吳宏龍泉彭
時中吉安曾萬中孫本立皆遣使納款命趙德勝廖永忠
等分兵攻瑞州臨江諸郡鄧愈帥兵襲浮梁侯邦佐棄城
遁于光進拔樂平敗偽蕭總管擒萬戶彭壽等六十八人
饒州悉定十月愈駐兵臨川之平塘時友諒將鄧克明據
撫州佯遣使通款無降意愈知其情掩甲夜趨比旦入城
克明單騎遁尋被獲

大志云十一月康茂才蔡遷等敗偽漢八陣指揮遂取瑞

昌縣

豫章書云八月甲申師克浮梁樂平先是元帥王思義克

鄱陽之利陽鎮擒賊首楊文友戮之遂會僉院鄧愈兵於
三洞源議取浮梁既而愈兵攻浮梁不下命理問谷繼先
院判劉文旺率兵往助之至是克浮梁友諒守將侯邦佐
等棄城走院判于光復攻樂平友諒總管蕭明率將拒戰
光擊敗之擒其萬戶彭壽等遂克之甲辰克南康以星子
縣令陳子亨守之九月辛卯僞漢平章吳宏王溥以饒建
降甲寅克德興壬戌王溥遣檢校劉巨川以南豐臨川金
谿降十一月僞漢右丞鄧克明遣其員外羅天錫以分省
印及撫州建昌臨江汀州四路南豐寧都富州三州樂安
臨川等十八縣印詣鄧愈降愈留克明于軍中令其弟志
明還新淦收其部曲克明請往九江謁見愈以兵送之中
途逃歸新淦明年于龍興城下被執

二十二年

壬寅

春正月明兵取江西龍興諸路

同上

明史紀事云正月太祖幸南昌胡廷瑞率祝宗康泰等迎
謁以鄧愈爲江西行省叅知政事鎮南昌時宗泰降非本
意即欲謀叛廷瑞密以言乃令帥所部從徐達攻武昌二
月太祖率胡廷瑞等還建康祝宗康泰行至女兒港遂叛
道掠布商船爲旗反兵劫南昌知府葉琛迎戰死之鄧愈
倉卒以數十騎出走數與賊遇愈窘甚連跳跨三馬馬輒
踣幾不免最後得養子所乘馬走還建康徐達聞變旋師
赴之宗至新淦爲鄧志明所殺泰走廣信以廷瑞甥特宥
之南昌復定太祖聞之喜曰南昌控引荆越西南之藩屏
得南昌去陳氏一臂矣非骨月重臣不可守五月命大都
督朱文正統元帥趙德勝薛顯同叅政鄧愈鎮之八陣指

西江志 卷三十一
揮聚衆結黨寨南昌之西山趙德勝孫興祖攻破之俘斬三千餘人十二月漢將熊天瑞寇吉安陷之殺守將孫本立友諒使其知院饒鼎臣守吉安鼎臣剽悍有膽略所至毒害人呼爲饒大膽文正遣兵復吉安鼎臣出走

豫章書云正月寧州土豪陳龍以分寧奉新通城靖安德

安武寧

元志寧州領分寧武寧二縣

六縣降

二十三年癸卯秋八月明兵與僞漢兵大戰於鄱陽湖陳友諒敗績而死同上

明史紀事云二月僞漢太尉張定邊陷饒州于光走還四月陳友諒忿其疆場日蹙大作舟艦高數丈飾以丹漆上下三級級置走馬棚下設板房爲蔽置艚數十其中上下人語不相聞艚箱皆裹以鐵自謂必勝載其家屬百官空

國而來兵號六十萬攻南昌壬戌薄城下諸將分門拒守鄧愈守撫州門趙德勝守宮步士步橋步三門薛顯守章江新城二門牛海龍等守琉璃澹臺門文正居中節制自將精銳二千往來策應丙寅友諒親督兵攻撫州門兵各戴竹盾如箕狀以禦矢石城壞二十餘丈鄧愈以火銃擊退其兵隨豎木柵賊爭柵文正督諸將死戰且戰且築通夕復完李繼先牛海龍趙國旺許珪朱潛等皆戰死五月丙子友諒復攻新城門薛顯將銳卒開門突戰斬其平章劉震昭敵兵退百戶徐明被執死之六月辛亥友諒增修攻具欲破柵自水關入文正使壯士以長槩從柵內刺之敵奪槩更進文正乃命煨鐵戟鐵鉤穿柵復刺敵來奪手皆灼爛不得進友諒盡攻擊之術城中備禦萬方殺傷甚

西江志 卷三十一
衆友諒分遣饒鼎臣等陷吉安李明道叛守將曾萬中死
之劉齊朱叔華被執陷臨江復執趙天麟以三人徇城下
文正等不爲動賊復攻宮步士步二門趙德勝巡城至宮
步門賊伏蹶張弩射之中腰箭深入六寸拔出遂卒南
昌被圍旣久內外阻絕文正遣千戶張子明赴建康告急
又詐遣卒號捨命王者詣友諒約日出降友諒信之緩其
攻至日城上旗幟一新友諒候至暮見無降意縛降卒至
城下殺之張子明取漁舟從水關出越石頭城晝行夜止
半月達建康太祖問友諒兵勢何如對曰友諒兵雖盛戰
死亦不少今江水日涸巨艦將不利又師久糧乏援兵至
可必破也太祖曰歸語文正但堅守一月吾當自取之乃
遣子明先還至湖口爲友諒兵所執友諒曰若能誘降非

但不死且富貴子明陽許之至城下呼曰主上令諸公堅
守大軍且至矣友諒怒殺之文正等聞之守益堅七月癸
酉太祖自將救洪都徐達常遇春亦自廬州還太祖親督
諸將會師禡纛于龍江舟師凡二十萬癸未進次湖口先
遣指揮戴德以一軍屯於涇江口復以一軍屯南湖嘴以
遏友諒歸師又遣人調信州兵守武陽渡防其奔逸丙戌
友諒圍南昌凡八十有五日聞太祖至解圍東出鄱陽逆
戰太祖率諸將由松門入鄱陽湖丁亥遇于康郎山友諒
列巨舟當我師太祖見之謂諸將曰彼巨舟首尾連接不
利進退可破也乃命舟師爲二十隊火器弓弩以次而列
戒諸將近寇舟先發火器次弓弩及其舟則短兵擊之戊
子徐達常遇春廖永忠等進兵搏戰達身先諸將擊敗其

前鋒殺千五百人獲一巨舟而還軍聲大振俞通海復乘風發火礮焚寇舟二十餘艘殺溺死者甚衆徐達等搏戰不已火延及達舟敵乘之達撲火更戰太祖亟遣舟援達友諒驍將張定邊奮前犯太祖舟舟膠于沙漢兵匝焉程國勝劍叱之與陳兆先大奮擊牙將韓成進曰古人殺身以成仁臣不敢愛其死乃服上冠袍對敵自投水中敵信之攻少緩宋貴陳兆先俱戰死常遇春從傍射中定邊定邊舟始却俞通海來援舟驟進水湧太祖舟遂脫通海與廖永忠以飛舸追定邊定邊走身被百餘矢退去會日暮太祖鳴鉦集諸將申約束恐張士誠乘虛入寇命徐達回守建康己丑太祖復親布陣與友諒戰友諒悉巨舟連鎖爲陣旌旗樓櫓望之如山我舟小仰攻多却太祖親麾之

不前右師少却立命斬隊長十餘人猶不止郭興進曰非人不用命舟大小不敵也臣以爲非火攻不可太祖然之命常遇春等分調漁舟載荻葦置火藥其中至晡時東北風起命以七舟束草爲人飾以甲冑持兵戟若鬪敵狀令敢死士操之備走舸于後將迫敵舟乘風縱火風急火烈須臾抵敵舟焚水寨數百艘燔焰漲天湖水盡赤死者大半友諒弟友仁友貴及其平章陳普略等皆焚死我師乘之又斬二千餘級友仁者即所謂五王也眇一目有智數臬勇善戰至是友諒爲之喪氣普略即新開陳也是日張志雄舟檣折爲敵所覺以數舟攢兵鉤刺之志雄窘迫自剄丁普郎余昶陳弼徐公輔皆戰死普郎身被十餘創首脫猶植立舟中不仆持兵若戰狀時太祖所乘舟檣白友

諒覺欲併力來攻庚寅夜令諸船盡白其檣旦莫能辨敵益駭辛卯復率衆大戰自辰至巳不解時劉基侍忽躍起大呼太祖亦驚起回顧但見基雙手揮之曰難星過急更舟太祖如言入他舟坐未定舊所御舟以礮碎矣友諒乘高見舟碎喜甚俄太祖麾舟更進皆失色廖永忠俞通海汪興祖趙庸以六舟深入敵聯大艦拒戰蔽之舟若沒有頃六舟旋繞漢軍而出勢如游龍諸將見之勇氣百倍呼聲動天地波濤起立日爲之晦時漢舟大我師環攻之殺其卒殆盡而操舟者猶不知呼號搖櫓如故已而焚其舟皆死至午敵兵大敗棄旗鼓器仗浮蔽湖面通海等還太祖勞之曰今日之捷諸君之力也友諒戰不利欲退保鞋山我師先至罌子口橫截湖面邀友諒不得出乃斂舟自

守不敢更戰是日移舟泊柴棚去敵五里許諸將欲退師少休士卒太祖曰兩軍相持先退非計也俞通海以湖水淺請移舟扼江上流劉基亦密言當移軍湖口期金木相犯日決勝太祖從之時水路狹隘舟不得並進恐爲敵所乘至夜令船置一燈相隨渡淺比明已盡渡乃泊于左蠡友諒亦移舟出泊瀦磯相持者三日初友諒戰不利右金吾曰今戰不勝出湖實難莫若焚舟登陸直趨湖南謀爲再舉左金吾曰今雖不利我師猶多勦力一戰勝負未可知何至自焚以示弱萬一舍舟登陸彼以步騎躡我後進不及前退無所據矣友諒猶豫不能決至是失亡多乃曰右金吾言是也左金吾聞之懼來降右金吾亦率所部來歸友諒兵益衰太祖既駐師彭蠡移書誚之友諒得書怒

留使者不遣盡殺所獲戰士太祖聞之命悉出所俘友諒軍視其傷者賜藥療之皆遣還下令曰但獲彼軍皆勿殺又令祭其弟姪及將士戰死者師出湖口命遇春永忠諸將統舟師橫截之又令一軍立柵於岸控湖口旬有五日友諒不敢出復移書與之友諒忿恚不答太祖與博士夏煜等日草檄賦詩意氣彌壯友諒食盡掠糧于南昌朱文正遣人燔其舟勢益困時我師水陸結營列柵江南北岸置火舟火筏中流戒嚴以俟八月壬戌友諒計窮冒死突出繞江下流欲由禁江遁回太祖麾諸軍追擊以火舟火筏衝之敵舟散走追奔數十里自辰至酉戰不解至涇江口涇江之兵復擊之張鐵冠大笑賀曰友諒死矣未幾有降卒來奔言友諒在別舸中流矢貫睛及顱而死諸軍聞

之大呼喜躍益爭奮擒其太子善兒明日平章陳榮等悉舟師來降得士卒五萬餘人張定邊乘夜以小舟載友諒屍及其子理奔還武昌復立理為帝改元德壽
遊宦餘談云定住為偽漢守臨江兵不滿千人屢挫強敵鄱湖之戰住以元戎領兵江上我師殲焉惜其不能擇主而身名俱隕也

二十四年甲辰春正月太祖建國號曰吳二月自將伐漢漢主

陳理降湖廣江西悉平

綱目續編

明史紀事云二月陳理降四月命建忠臣祠于鄱陽湖康

郎山祀韓成丁普郎等三十六人建忠臣祠于南昌府

癸卯

冬改洪都府為南昌府祀趙德勝李繼先等十四人時熊天瑞尚據

贛州八月命常遇春鄧愈率兵討之愈與遇春合兵平臨

江之沙坑麻嶺牛陂諸寨執僞知州鄧志明送建康及其兄克明俱伏誅時李明道匿武寧山被獲以其反覆亦戮之遇春兵次吉安遣人語饒鼎臣曰吾今往取贛可出城一言而去鼎臣怖不敢出遣其幼子出見遇春坐而飲之曰歸語而父可善自爲計鼎臣夜棄城走安福遇春復吉安引兵趨贛州已而鼎臣復肆剽掠王國寶擊斬之九月常遇春等圍贛州未下太祖諭之曰熊天瑞困處孤城猶籠禽阱獸豈能逃逸但恐城破之日殺傷過多要當以保全生民爲心一則可爲國家二則可爲未附者勸時天瑞拒守益堅遇春乃浚濠立柵以圍之

明史藁熊天瑞傳云熊元震本姓田氏善戰有名天瑞養以爲子常遇春之圍贛也元震竊出覘兵勢遇春亦引數騎出猝與相遇元震不知爲遇春過之及遇春還始覺遂單騎前襲遇春遣從騎揮刀擊之元震奮鐵搥且戰且走遇春曰壯男子也喜其才勇後從天瑞降薦爲指揮使又贛志云永新人尹堅從熊天瑞據贛爲兵馬指揮登城飛鉅石傷常遇春頰明日天瑞降堅將自殺遇春召慰曰好男子當如是留置幕下還朝言于上命武士與角力皆不支以爲直殿將軍

鄧愈傳云太祖已平武昌使愈率兵徇江西未附州縣鄧克明之弟志清據永豐有卒二萬愈擊破之擒其大帥五十餘人其徇安福也部卒有鹵掠者判官潘樞入謁面責之愈立驚謝趣下令掠民者斬索軍中所得子女盡出之湯和傳云討平江西諸山寨永新守將周安叛進擊敗之

連破其十七寨圍城三月克之執安以獻

二十五年乙巳春正月偽漢守將熊天瑞以贛州降於明元史

明史紀事云正月天瑞被圍日久力不能支乃降其所統

南安雄州韶州諸郡皆下太祖聞遇春克贛不殺喜甚遣

使褒諭先是天瑞橫斂取民財悉命罷之遇春進師南安

招降未下諸郡振旅而還

陸仲亨傳云從常遇春討贛州天瑞降為贛州衛指揮使

節制嶺南北新附諸郡調兵克會昌悉平諸山寨

黃彬傳云歐普祥死彬領其眾從常遇春征贛州饒鼎臣

據吉安為熊天瑞聲援遇春至鼎臣走安福彬以兵躡之

走茶陵天瑞乃降從湯和執周安後移鎮袁州招集諸山

寨江西悉定

大志云都督朱文正遣叅政何文輝指揮薛顯討新淦鄧

仲濂明史薛顯傳作仲謙斬之擢薛顯為江西行省叅政

餘干災祥志云吳乙巳年寇蕭明雷應霖襲餘干知州侯

斌遇害

二十七年丁未明太祖吳元年冬十月太祖命胡廷瑞率吉安等軍南

取八閩綱目續編


何深傳云深獲陳友定守將張子玉因請發廣信撫州建

昌三路兵規取八閩太祖喜曰子玉驍將擒之則友定破

膽乘勢攻之必克乃命廣信指揮朱亮祖由鉛山建昌左

丞王溥由杉關會深齊進明年二月湯和等執陳友定械送京師

西江志卷第三十一





成屏風三疊余戲名曰肘後屏風他日湖中石百怪並出當以此兩石為祖云

惜竹軒明一統志在宮亭湖邊宋秦觀嘗宿此軒夢神女贈詩曰不知水宿分風浦何似秋眠惜竹軒聞道文章妙天下廬山對面可無言

濂溪故居豫章集春陵周茂叔中年乞身老於湓城有水發源於蓮花峯下潔清紺寒下合於湓江樂之築屋其上名曰濂溪蓋取故里之川以名云朱子記遺墟在九江郡治之南十里淳熙丙申太守潘慈明通守呂勝已復作堂其處揭以舊名桑疏在蓮花峯下

光風霽月亭朱子山北紀行詩注四月六日拜濂溪先生書堂遺像子澄請為諸生說太極圖義先生之曾孫正卿彥

卿元孫濤為設食於光風霽月之亭廬山志在濂溪祠桑疏晦翁建亭後燬明弘治中僉事王啓更建濯纓交翠愛蓮光霽四亭自為記

生意堂名勝志在府治後周濂溪先生領江州提刑時創窗前草不除人問之曰與自家意思一般因扁曰生意堂

濂溪太極樓見宋樂雷發詩

煙水亭林志在甘棠湖隄上宋周元公子司封郎官壽建取山頭水色薄籠煙之義名焉施閏章記湖中高阜舊有亭曰煙水樓曰鏡波為士大夫詠遊處亂後十餘年無人跡矣康熙庚子員外郎崔君正誼司權來潯集工度木構亭及樓咸復舊規

清虛庵明一統志在廬山宗紹興中皇甫坦賜隱廬山高宗

名其所居曰清虛庵光宗在東宮日嘗問坦山中所乏坦曰但水差遠光宗因大書神泉二字遺之云持歸以意鑿一泉坦乃於庵側穿一小井甫施畚鍤而泉已湧

甲秀堂文德翼求是堂集宋陳氏廬山甲秀堂所藏帖與書號為天下第一

疊翠亭林志在府城南五十里宋岳飛建以對廬山九疊故名

清風閣林志在府治東人慕太守宋均清德故建明洪武間重建正德中同知汪淵始肖像重新

清燕堂林志在府治後宋守錢稔建吳說書額

漪嵐堂林志在德化縣治西偏宋縣令吳怡建丞相洪适有詩

雲無心堂陸游遊廬山記至太平興國宮憩雲無心堂蓋冷翠亭故址也溪聲如大風雨至使人毛骨寒慄一宮之最勝處也

樞密庵陸游遊廬山記草堂之傍又有一故址云是王子醇樞密庵基蓋東林為禪苑始於王公而照覺禪師常總實第一祖也

授墨堂廬山志在墨僊泉初名遇仙堂宋白玉蟾有授墨堂記

白蓮堂廬山志在東林寺宋謝文節枋得有修白蓮堂疏紫煙樓林志在府治後宋余崇龜取唐李白詩日照香爐生紫煙為名

三賢堂林志在府治後祀陶潛狄仁傑白居易宋時建

蘇白堂廬山志在東林寺祀香山東坡者

靜虛精舍吳草廬集江州柳從龍雲卿居闌闔之中厭喧囂之聒擇幽曠之地為藏息之廬晨省之暇飽玩聖賢之書扁曰靜虛

一柱峯亭道園錄小孤山舊有亭在山半足以納百川於足下覽萬里於一瞬故宋江州守臣厲文翁之所築也距今六十三年日就圯毀延祐五年安慶通判李維肅為新其亭而更題曰一柱峯亭集為之記

牧羊亭見虞集一柱峯亭記在小孤山上

攬秀亭林志在府南宋人所築元總管李黼重建

萬里江天亭明一統志在彭澤水驛前元大德間邑令曹靖國建

讀書巖元王德淵碑記宋耆人石興宗振作尉於此攜其三子就巖讀書黃太史訪興宗遂為親書三字曰讀書巖小當時名賢卿士大夫題詠旁午中經兵火委於榛莽之墟今縣尉和公仲寬按圖經復舊觀而一新之又構六角亭於巖之前志復古也

稽古亭林志在彭澤縣讀書崖下宋縣尉石振建後尉焦良輔重建

匡山精舍明一統志在府治南元姚燧讀書處

聽雨軒李涇遊廬山記過聖治太平宮宿聽雨軒

御碑亭廬山志在白鹿昇仙臺南桑疏御碑亭以奉安太祖御製周顛仙碑神藻流輝煥耀雲漢丹巖翠壑雨露生春蓋二百年於此矣亭以石構制甚宏壯

訪仙亭吳闡思匡廬紀遊去佛手崖數十步沿石壁而行鑿山構亭曰訪仙謂顛仙也

聚仙亭吳闡思匡廬紀遊天池寺西數步有亭祀天眼尊者周顛仙赤脚僧徐道人王陽明先生顏其額曰聚仙

山水之間樓林志在府城西海天隄上明正德十六年戶部主事鄒輓建枕江流面匡廬為潯陽登覽之勝邑人柳邦傑記

觀易臺廬山志在香爐峯紫雲庵東薛應旂記薛子署白鹿洞書院時嘗過紫雲庵庵東有巨石如砥縱橫約三丈餘終日坐於其上恍若有悟時閩中王慎中以叅議分守是方聞之徒步過訪遂屬有司為余築室三間題曰觀易臺護松亭廬山志在金竹坪千佛寺大雄殿側蒼松蟠頂如蓋

明馮時可建蔡毅中書額

大林寶樹廬山志在上大林寺二株葉如刺杉而細如瓔珞柏而長桑紀謂為娑羅木者非也娑羅葉如楓而七出名七葉木與此不類相傳晉邪舍尊者自西域移植其一尤大枝葉婆娑下蔭十畝解帶量之圍三丈餘

墨竹名勝志在瑞昌縣西亭子山舊傳東坡赴黃州過山題壁墨瀟灑竹間至今竹有墨痕人爭異之為構東坡亭

南安府

庾將軍城元和郡縣志前漢南越不賓遣將軍庾姓討之築城於此明一統志在府城西南二里名勝志漢志云庾勝者梅賁之將隸番君從高帝定天下使分兵守臺嶺築城嶺上臺嶺者大庾嶺也有石平如臺在縣南二十五里

南楚廢縣明一統志本漢縣屬豫章郡後廢為鎮

南康古城明一統志在南康縣治西南晉縣

大庾縣舊治明一統志在府城東二里宋淳化初徙縣治於此元復今治

上猶縣舊治明一統志在上猶縣治西宋紹興間始徙今治

峯山城名勝志小溪城北十五里為峯山城其人素善弩大

庾縣志正德丙子都御史王守仁選為弩手從征徭寇事

寧民恐報復築城自衛

水南城名勝志在章江南與郡城夾江而峙民居稠密倍於

郡城明嘉靖辛酉勅築南門曰梅山門外即梅嶺路街有

五里折梅亭成化間郡守張弼建

新田城鳳皇城楊梅城小溪城九所城城池志庾嶺北四十

里為新田城又五里為鳳皇城鳳皇西四十里有楊梅城

俱嘉靖四十四年築北十里為小溪城舊有驛今遷去先

十年築東五里為九所城亦四十四年築

橫浦廢關太平寰宇記漢將軍楊僕討呂嘉出章郡下橫浦

即此處明一統志在府城西南三十里秦時關也關外嶺

峻絕關內廣谷可容寨柵疑即古入關之路及張九齡開

鑿庾嶺此關乃廢

梅關明一統志宋嘉祐中立清正集踰橫浦而南陸行十餘

里山行五六里盤迴繚曲躋於嶺巔界江廣之交石壁對

峙是為梅關名勝志關之外南下亦峻關之內有廣谷九

柵故址隋開皇十年番禺王仲宣反立九柵大庾嶺詔裴

矩進兵擊破之即此

梅花國明一統志在大庾嶺下舊有官驛庭院甚整郡守趙孟邁扁曰梅花國蓋自此而上嶺曲皆梅故名

橫亭吳錄南埜有山其路峻阻螺轉而上踰九蹬二里至頂下七里平行十里至平亭平亭者橫亭也為古入關之路皇僊臺林志在南康縣北九日山東巔俗傳有皇甫道人於此成仙故名

尊敕樓名勝志在同知解宋司法廳掌敕令也

金蓮堂名勝志在城北金蓮山下為迎送候館內有松風壇墨花亭舞劍臺諸勝左側鐵岡上有猴獅臺一名候使臺花雨樓名勝志去府城東南二里為東山山半西凹林木蒼翠中有仙翁庵五山亭花雨樓

宋甲仗庫名勝志在治西中藏甲冑刀盾之屬二三百具城

守雜器稱是蓋狄青收僂智高之餘物也

宋公使酒庫名勝志在治西中有芙蓉堂燕堂酒名宜城春其坊皆依酒經釀造元豐間黃庭堅典南安試貢院無酒飲周道輔自贛來攜一榼時時對酌試畢尚有餘

清虛亭林志在府治內宋大中祥符間知軍嚴肅建通守狄棐記

延松堂名勝志在通判解內宋寶元間石曼卿書扁淳熙戊戌軍倅胡藻文劄張九成題寶界寺柱數語嵌於東楹名臣言行錄紹興中張子韶謫南安既至寓軍之寶界寺結廬日與生徒講藝退則手一編倚柱就明積久柱下甃甃雙趺隱然因自號橫浦居士題柱以識云平生好書老來病目執書就明於此者十有四年矣淳祐中軍倅胡元質

西泠志 卷四十一
三
剗其題柱去曰恐久而壞也知軍李大正曰筆跡之壞孰與跌跡明日訪於寺則并跌跡亦失之

鐵漢樓彭韶記元城先生以紹聖中謫知南安軍道改提舉洪州玉隆觀本軍居住遂奉母夫人來寓寶界院未一年復徙嶺南瀕危數四東坡嘆曰真鐵漢也成化戊戌東海張弼來爲守暇考圖志撤而新之題曰鐵漢蓋用東坡語也

墨君樓名勝志東坡墨竹在寶界寺東廊鐘樓下有諂韓侂胄者剗其壁函盛以獻京師因渡錢塘江溺焉今墨君樓竹乃元人補爲之者又郡治有石刻竹石張九成跋云東坡先生自海上北歸過橫浦到常樂戲掃竹石於壁輪囷離奇跌宕兀傲結想風月中磅礴乎萬物之表而徜徉乎

八極之外豈世間筆墨所能到耶埋沒荒寺久矣紹興癸酉十一月郡守王徽倅李知止恐風霜剝落命工摹刻置之郡治以傳不朽俾范陽張九成書其後

蘇步坊名勝志南康縣治東七十步有蘇步坊蘇子瞻南遷經此過田如鰲六經堂留題因名

田氏水閣蘇文忠集予初謫嶺南過田氏水閣東南一峯豐下銳上里人謂之雞籠山予更名獨秀峯今復過戲留一絕載藝文

此君堂林志在府治內郡守林椿建舊有竹千竿匝其三面面面亭林志在府治內宋紹興己卯郡守趙衍之建取昌黎詩面面看芙蓉爲名

風月臺名勝志城中三臺府後堂東偏者爲中臺以宋周濂

溪為軍司理時程太中為通判遣二子從學於此改名風
月臺嶺北道公署後為東臺侍郎劉節宅內為西臺明陳
獻章應召宿風月臺詩黃菊花開又一年南山無分對陶
潛不知風月隨儂否惱殺臺中此獨眠

超然臺明一統志在府城內宋建下有池多花木

尊道堂林志在府學內宋米芾書扁

忠恕堂林志在分司廳後宋李櫛記

綠陰亭林志在府治內宋至道間知軍李夷庚建亭側有池
竹樹森列王奇詩初得幽亭近嶺梅綠陰名好稱仙才四
邊山色簷頭出一帶泉香竹裏來

桂華堂林志在府治內宋紹興中知軍李聞之建舊有古桂
竹軒張九成自記子張子謫居大庾借僧居數椽閱七年即

東窗種竹數竿為讀書之所因榜之曰竹軒

聯瑞堂林志在府治東按察分司內宋紹興間通判邵拱建
以三見池蓮並花故名

綠微臺名勝志在南康縣治內宋相陳升之父為主簿時以
石甃臺建亭其上扁曰綠微紹興中邑宰劉將之易名陳
公臺

旭嶺書臺府志在南康縣北九日山宋陳升之宰邑時築山
椒有旭亭

揖秀亭林志在府治內雙秀諸峯拱揖於前宋淳熙間知軍
李大正建

雲章閣林志在府學東宋淳熙間建以貯經籍者理宗書道
源書院四字賜額

種德堂徐清正記金華徐杲明仲為南安郡理官政成課最
上有日矣扁其堂曰種德詩以自見而委鹿卿為記

橫浦亭徐清正詩巋然一亭石境界涵幽清李侯昔經始扁
以橫浦名

曾氏清江亭徐清正集亭有無垢澹庵真跡

愛山堂徐清正詩序愛山堂大庾之西館也始名裕民繼超
然近世浚儀趙君為令始易今扁南安居嶺北環城大抵
皆山而面勢局隘以偏惟斯堂對五侯峯太平山圍繞於
後如蓮幕中坐達觀疎林前橫溪流映帶一佳處也

字民銘林志在南康縣治宋度宗製并書刻於石末云咨爾
令長守而勿墜宣朕實意斯為愷弟

金鰲閣名勝志水南城北門名也閣在其上金潤記南安介

萬山間得掌平之地為郡治門臨清流其上有樓高出霄
漢下有重灘萬派百折入江嵐煙與旭日相銜青螺翠黛
隱隱重重雖畫圖不如

按林志作江山佳麗樓

玉潭館明一統志在南康縣西三十里宋寶祐間建

銀渡館明一統志在南康縣西三十里宋寶祐間建

瑞露軒明一統志在南康縣治宋令陳廷傑有善政甘露降
於古松因以名軒

蒙川館名勝志城東南二里為東山山半為真覺寺寺之檐
有泉鑿為曲水蒙川館在其上旁有下馬松醉石

按蒙川先生劉黼為太學生時劾丁大全之奸安置南
安軍及少帝航海與陳宜中俱至羅浮病卒明太守張

弼作館表章之

大傅營林志在上猶縣西北牛田里久廢

南安塞兵萬戶府名勝志在府治西宋僉判廳元置萬戶府於此舊有碑刊煙瘴藥方其上今爲民居

玉池坊名勝志水南之西管界都有玉池坊池產青蓮其蕊差小不結房色如碧玉與凡蓮迥異地勢高洪水不能及故有水滿玉池蓮之讖

釣月臺名勝志大庾西十里有西華山之澗兩峯及底俱石名曰石澗無魚蝦弘治中知府鄧公闢澗傍得一石甚平命曰釣月臺

李相亭名勝志在上猶縣北騰龍嶺明成化間知府張弼因宋相李綱曾經過此立李相亭其上

東山寺鐘明一統志在上猶縣西童子保昔有大鐘形旋如蛟一夕忽飛去墮於相陂潭見者以告遣人沒出之則化爲真蛟蜿蜒可怖竟不敢近至今水泛數十里間鏗然聲震虛谷時有見之者形猶鐘也

贛州府

贛縣故城太平寰宇記漢高六年使灌嬰畧定江南爲贛縣立城以防趙陀今州西南益漿溪故城是也

廢陂陽縣太平寰宇記在虔化縣東一百五十里吳嘉禾五年置揭陽縣晉太康五年改爲陂陽縣以陂陽水爲名隋開皇十三年廢入寧都

葛姥故城虔州圖經章貢二水合流爲贛其間置邑因爲贛縣晉太康末洪水橫流忽有大鼓隨波而下入葛姥故城

衆力齊曳蹲而不動卜於其地置縣吉遂徙以就焉輿地志葛姥者漢末避黃巾賊出自交趾貲財巨萬童僕數千於此築城爲家沒後有靈異人因立祠祀焉

南康郡故城太平寰宇記東晉永和五年太守高珪置郡城於章貢二水間義熙七年徙於贛水東梁承聖元年復於章貢間宋爲南康國梁陳皆爲南康郡隋平陳改爲虔州

名勝志舊城基在杖華坊今古城巷是

雩都故縣林志有二一在縣西北五里西漢建一在縣東南仙桂里大昌村陳永定間建

寧都故縣林志有三一在縣治南五十里白鹿營吳建一在縣治北陽田營晉建一在十二都徐觀劉宋建

玉臺南康記君山上有玉臺方廣數丈周圍盡是白石柱自

然石覆如屋形也四面多松杉遙眺峩峩嚮像羽人之館風雨之後景氣明淨頗聞山上有鼓吹之聲

神闕南康記歸美山去安遠縣西南三百里下有石城高數丈有一門門外有二石夾左右高數百尺遠望嵯峨靈闕騰空故老謂之神闕

金雞穴南康記山臨貢水石色如霞其傍有穴廣四尺一石正當穴口如彈丸嘗有金雞出入此穴晉義熙中再三出見有人挾彈放丸於穴口化爲石其雞至今不見因號曰金雞穴宋永初中雞又見栖翔於此

石井南康記盤固山有石井井側有大銅人恒守之五百年水一湧起銅人高數丈銅人以手掩之其水即止

石室輿地志贛縣黃唐山有石室如數千間屋上通天窗下

有方榻者二石人中櫛而坐傍有小石室七所相連悉有石人室前時有車馬跡春夏草不生無諸毒蟲林木繁茂水石幽絕蓋靈仙之窟宅也山下居人每丙日輒聞笳鼓簫樂之音鄧德明云有石子如彈丸聚在山角至丙日不見他日復有

石寶穴府志在雩都縣瀕江舊傳有黃衣人候舟乞食於篙師既飽唾去竟入石中回視所唾皆金

鬱孤臺名勝志一名賀蘭山在府治麗譙坤維百步隆阜鬱然孤峙故名唐李勉爲州刺史登臺北望慨然曰余雖不及子牟心在魏闕一也鬱孤豈令名乎乃易扁爲望闕豫章書宋紹興丁卯郡守曾慥增剏二臺南曰鬱孤北曰望闕林志明洪武初即臺平治建嶺北道署後徙改爲察院

正德間知府邢珣因議者謂此臺秀拔關一郡文運遷察院於城西文筆聳然復舊嘉靖中汪御史尚寧又加培築萬壑臺唐書建中三年刺史路應請建定遠縣築臺縣治內曰萬壑臺

鍾紹京書堂名勝志在東巖去興國縣東北三十里石案石硯具在靈湖有鍾手放巨魚帶以銅環人時見之

衷愉舊廬名勝志在君子峯下去寧都縣北二十里南唐御史大夫衷愉結廬奉母隱此

拜將臺林志在南城下後唐節度使盧光稠築址尚存

柏林書樓李泰伯記石城鄉進士溫革莫居柏林因作講學堂房數十楹攻位之日獲五銖錢五萬於地士友珍之或以青錢名其館凡書在國子監者皆市取且爲樓以藏之

章貢臺趙抃記水別二派合流域郭於文爲贛子嘉祐六年
出守間爲觀遊治西北隅有野景亭舊址於是復臺其上
以新其名爲章貢蓋不失其實也

石樓林志去府治一里蘇軾八境臺詩坐看驚湍遶石樓即
此

八境臺贛州志在郡治東北下瞰奔流蘇文忠集孔君宗翰
始作石城城上有樓觀臺榭東望七閩南望五嶺覽羣山
之參差俯章貢之奔流新志康熙二年燬於火虔院林天
肇虔鎮姚自强鼎建四十四年知府朱光圉重修

卓蓋樓名勝志在翠玉樓左文信國詩一水樓臺繞半空圖
畫開

白鵲樓贛州志在八境臺北趙清獻記云望闕鬱孤軒豁於
前卓蓋白鵲瞰臨左右

螺亭太平寰宇記螺亭石山巨石臨水螺殼無數凝結石畔
塵外亭虔州志馬祖巖上有馬禪關及雲端駒巖一憩塵外
四亭

鳳凰臺林志在府治龜岡與章貢鬱孤同建後爲民居宋寶
慶間州守聶子述復之又堙府志明隆慶間知府黃宸復
建亭堂於上通判廖憲增置諸生書舍都御史張雨記
昇仙臺名勝志在石城縣太極觀後相傳宋大中祥符間徐
王二道士登仙於此

釣臺府志在雩都縣需巖西宋邑人王鴻釣魚處手篆猶存
熙熙臺宋杜東記在明覺院東北隅臺處阜巔四面廣袤皆
四丈獨立而無朋居高而不峻政與縣治對

登春館杜東記熙熙臺側廳事堂舍名曰登春蓋嘉定八年
寧都令廖益仲創以待客之沓至者

七松亭林志在府治後有宋趙抃手栽七松

東樓林志在府治東宋州守趙抃建扁曰思賢嘉定間趙時
逢改今名

濂溪閣府志在零都縣南五里善山上宋周敦頤倅虔時曾
遊此賦詩邑令沈希顏因建此閣頂有高山仰止亭

王鴻隱居府志零都縣南四十里爲需巖宋孝廉王鴻隱居
在焉鴻工篆籀有泉曰龍光液松曰甘露松皆鴻表也木
樨巖在其下有池曰需塘左涵虛洞右釣魚臺又里許爲
墨煙巖曲徑盤旋松竹茂密亦鴻所闢

望需亭府志在零都縣城西隅宋縣令張宗諤招邑人王鴻

于需巖不能致乃作亭以望之

豫源館林志在府城西宋郡守趙時逢建

竹林隱居府志在寧都縣即延春谷爲孫勰孫勵舍蘇軾榜
其名

六友堂輿地紀勝宣和壬寅鄧衍知寧都於縣之圓通院建
六友堂蓋同時丞方庭實簿張參東尉俞誼西尉方某監
務何常併行六人同登政和甲午進士科云

畫錦亭名勝志在延春谷去寧都縣南里許其下即贛江也
水竹幽居名勝志在箕簞谷去寧都縣西北七里宋儒曾興
宗築修竹數十畝翠篠蒙密中有飛來獅子二峯翠巖釣
臺瓢泉諸勝朱子詩有寄題梅川草堂即指此谷

瑞蔭亭夷堅志信豐縣水南有瑞蔭亭亭前兩巨樟相去百

餘步其高拂雲紹興癸丑秋大水浸縣兩樟之間為水洶
洗露出一連理枝自東徂西長四十五丈枝下去地丈許
灑江亭石湖集陳季陵新作亭李正之榜曰灑江要予為詩
袞衣葺燾堂林志翠玉樓下留元剛昔從乃祖魏公出守後
又迎父越師公就養故名真德秀記

翠玉樓名勝志在府治後舊名逍遙宋淳熙間州守留正重
建取蘇軾山為翠浪湧水作玉虹流句名之文信國有詩
潔襟亭名勝志在寧都縣西南一里縣令鄧衍建以覆陸公
泉者

揖仙閣林志在石城縣東舊名雙溪宋寶慶元年知縣事黃
岌重建以面劉仙姑嶺名也

章貢道院楊萬里記慶元五年括蒼張公貴謨來尹不期年
而民罔不信治以最聞乃指其燕喜之堂曰此吾州之道
院也遂易其扁曰章貢道院

筠坡宋程實之記族子誠叔築室於里居西倚阜東瞰湖雷
溪縈之金山屏之花木薦芳雲物効奇水石逞秀其諸瓌
奇殊特之秀觀得於晦明涼燠之變者總總也而筠坡是
名

尊已堂宋程實之自記自年大以來闢讀書之堂取韓子以
衆人待其身而以聖人望於人之戒扁曰尊已以為存心
養性修身立命之所焉

合江樓林志在府東北據章貢合流宋州守留元剛建文信
國詩雙江日東下我欲賦歸舟

鑑書樓府志在信豐縣東三十里武山下巖壑幽邃地名竹

邨宋時所建

議道堂林志在府學西宋紹聖中提刑程筠建左爲松軒右爲竹軒李朴記

廉泉亭廉泉紀事在府城東南宋州守趙履祥建明隆慶戊辰知府黃宸重修王太史弘誨記

瑞洲樓府志在興國縣東瑞洲壩上宋嘉定中縣令李伯堅建明正德中壩爲水壞樓廢

宣明樓府志在府城鬱孤臺左宋嘉定丁丑州守留元剛建樓於甕城明洪武初知府婁仲脩扁今名正德乙亥知府邢珣重修顏曰章貢偉觀嘉靖壬午知府羅輅又改宣明曰宣化萬曆辛亥災知府陳宗愈楊瑩鍾相繼修復仍名宣明

覽秀亭府志即四望亭在信豐縣西南城上高據一邑宋嘉定三年縣令萬億建

勤王壘名勝志興國縣衣錦鄉有文信國勤王壘累石爲墉三層其隘上署都督行府基尚存

六和精舍名勝志去會昌縣西南七里邑人尹天民讀書處前有石窗石鼓瀑布水簾試劒石六和精舍

清獻堂明劉鴻記洪武中聿新郡治爲堂其北以休寮案榜曰清獻示景行也

崆峒山房王禕記贛城劉君宗弼之居南望崆峒近在目睫故讀書之室名曰崆峒山房及出而仕使節所至即以向之名書室者爲所居之扁焉曰吾以志鄉土之思也

凌雲亭林志在金精山漢女仙張麗英飛昇之所明正統間

建

紅雲閣在會昌縣城內明梁潛詩一上高樓望眼賒遠山如畫絢晴霞

鎮山樓府志在安遠縣治後明弘治癸丑知縣甘文紹鑿山為城建樓以鎮之

天一閣府志在州前與城外火燄山相對鑿井閣下取以水制火之義明正德丙子知府邢珣重建布政使蔣曙題名陽明小洞天名勝志贛城西二十里通天巖嵌石如房巖洞高廣宋元祐中郡人陽行先隱此明正德丁丑贛撫王守仁平龍川剽寇班師遊此作平南記刻洞壁扁曰陽明小洞天

盧子占故宅金堡詩虔州有清池長夏生冰霜當年盧少叅

舉族斯淪亡

勤政樓府志在雩都縣治前明嘉靖丙辰知縣羊修移禁鐘於上萬曆癸未災知縣劉昌祚重建顏曰勤政李涑記之國朝康熙乙亥燬知縣趙愷重建

太極亭府志在府西濂溪祠後明萬曆甲辰都御史張岳建列王守仁所書太極圖說大學古本序及中庸說諸石刻於中楊起元記

毓秀臺府志在瑞金縣北二里上有閣明萬曆丁酉知縣林德廣建歲久臺圯閣廢

國朝康熙癸未知縣田俞倡紳士修復蒼松環繞峯巒屏列後有寺魚磬梵唄聲隱隱從臺下出每當重九邑人多攜酒吟眺於此

來星閣府志在信豐縣東七里明天啓乙丑知縣蔡自強重建與邑人爲文會觴詠其上曰香山社後燬康熙壬午知縣張執中追復舊址累石爲臺重建崇閣於上
皆春堂董越記在贛邑治後今令五羊何侯所扁也
黃芝園名勝志在瑞金縣南里許雲龍山麓嘗產靈芝有黃雲覆之

西江志卷第四十二

